

## KWALULWABUBANA <sup>2</sup>

Amiwa . . . nakelwako pacheche. Najinga na muntu wa kondo, wa kondo bingi, kabiji Amiwa nayiletu pa kyonkakya kimye, mambo wajinga bingi, watama bingi. Kabiji naendeshe lwendo lonse kufuma ku Michigan, ulama mutende wangichile, kabiji ne bakwabotu, amba uji bingi, watama bingi. Pano, bino usa kwikalatu bulongo; byonsetu—byonsetu byaikalatu bulongo, nanchi akyo kijitu bulongo. Inge Nkambo waiyapo, bintu byonse bikalatu bulongo, ibyo nyi? Oo, Aye—Aye ye wawama bingi; kulanguluka pa buwame Bwanji ne lusa Lwanji, pa byo aalumbulula Aye kwi atweba, kabiji byo luji lwawama lutakaiko Lwanji.

Kyawama, twaeseka kutatula, kwaamba mba tusa kusenda byapitala bitanshi bisatu bya mu Buuku wa Efisesa. Kabiji Nalanguluka mba tuji na byambo bitanshi bisatu, nangwa bintu bitanshi bisatu *bya yewo musango* papo. Atweba kechi twayile palepa ne, bino kape bufuku buno tusakuyako palepako pacheche. Bino, Amiwa nasaka kwamba mba Amiwa kechi ne wafunjishiwa Baibolo ne, kwalepeshatu, kabiji kiji kwalepeshakya kya kuuba mba naikala wafunjishiwa mamboawama, bino Na—Namutemwa Nkambo, kabiji Namutemwa kumwingijila Aye ne . . . [Mulongo waamba kwi Mulongo Branham—Waku.]

Muntu umo, kyakupulumukilatu, amba, kasatukyangye kutwajijila, nsongwakazhi wa muचेचे uji mu kipatela ku Louisville, kabiji bonse basendwe bayukisha ba mukakalwa, pano aye ubena kufwa, kabiji baipuzha kyakubila pa yuwe mwaana. Nobe Benakilishitu, ke mwingilo wetu wakukunyika mitwe yetu, pano, amba tulombe.

Nkambo Wentu wawama, kechi ke mwingilo wentutu ne, pakuuba ke jishuko jetu, kabiji ke yetu—nkebelo yetu ke ya kuuba mba tukunyike mitwe yetu bufuku buno nobe kipwilo, nobe jibumba ja-baitwa, bantu baketekela muno bufuku buno, mu kufunjisha Kyambo Kyenu, kibena kwitwikajika mu Mubiji, mo tuji na lubaji, kabiji monka mo twafwainwa kwingijila kasa twakwatakana nobe bamembala ba Mubiji wa Kilishitu.

<sup>2</sup> Kabiji pano atweba twaitwa amba bukiji bukijitu tuye kwi Lesa. Kabiji atweba bataata tulanguluka byobyo, ibyepi awa nsongwakazhi wamuचेचे inge wajinga wetu, michima yetu yafwainwa kukaba ne kukola mukachi ketu, kabiji twakonsha kwita bipwilo amba bilombe bukiji bukiji. Kabiji muchima wataata umo ubena kukaba, ne kukola. Nkambo, lekai awa Muntu mukatampe wa bu Mupashi Wazhila eye ponkapano ku muchima wayewa taata. Fumyaipo kuzhinauka kuji konse, kabiji ne kukola konse, kabiji lekai aye ayuke mba Anweba

mwi Lesa kabiji kechi kujipo kikola kyakonsha kwimana mu Kyeenyi Kyenu ne umvwe mwingilo Wenu wa Bulesa waingijiwa na kipwilo Kyenu kabiji ne na bantu Benu.

<sup>3</sup> Kabiji kupita mu mulungu yense, tubena kulombatu, kufuma pa Mulungu Amiwa nabaalangulukenga pa bibye bintu nangwa pa iye milombelo. Atweba kechi tujipo na kilwilo kikatampe nobe mwayila mwenkelo ku ntanda ne, pakuuba ao malekenyi acheche anshita bingi inge akwatwa mu minwe ya lwitabilo. Anweba Nkambo, lekai iye milombelo ifike, alwa lufu lwakobama popa peulu ya yewa mwaana, kabiji lekai lonaike; fishi, kufituluka, bifume ku lubaji lwa mwanya wa yewa mwanyike, awa lukeke nangwa mwaana, nsongwakazhi wa mucheche. Kabiji lekai akya Kyeya kikatampe kya Kyeenyi kya Lesa kisamine pe aye. Lekai afume mu kyokya kipatela, mwaana ujitu bulongo.

<sup>4</sup> Lesa, twayuka mba kubushiyatu bwa mukola batemwe betu babena kupembelela, kabiji ke kyawama bingi. Bino atweba twatemwa baana ba bacheche betu. Kabiji twalomba, Nkambo, konka ku lukumo Lwenu, mba Anweba musakupulusha bumi bwa mwanyike. Atweba, nobe kipwilo Kyenu, twakajipila alwa lufu, kabiji naamba mba, “Imanaitu zoo koko. Obewa kechi wakonsha kusenda mwaana ne, mambo twakeba bumi bwanji na mambotu a Bufumu bwa Lesa.” Swishai bibye bintu, Nkambo, kiyetu ponka pa kishilwa po twatuma, mu Jizhina ja Yesu Kilishitu, Mulpulushi wetu. Amena.

<sup>5</sup> Bushe twaketekela nyi? Amiwa kechi nayuka kyo Nakonsha kuuba ne inge Amiwa kechi najinga Mwinakilishitu ne. Amiwa kuuba natemwa kutwajijila na kwikala ne. Kechi kuji kyakwikela ne, kanatu kuuba mba bamo bapuluke, kyo kyawamisha kyo Nayuka.

<sup>6</sup> Pano, bufuku buno twasaka kupitulukamo mu lufunjisho lwetu lwa kunyuma. Kabiji Amiwa nsakweseka kutanga, mambo, kyapitala yense, inge Nakonsha bufuku buno. Nanchi pa Mulungu lukeelo Amiwa kape kabikamo pa Mulungu lukeelo ne bufuku, inge kyakonsha kwikalatu bulongo, pakuuba mba kесеke kubikamo iye ntachikilo yo Mbena kukeba kipwilo mba kimone. Oo, ke kintu kyawama inge watuluka kifulo kyobe! Kabiji kafwako wakonsha kuuba kintu kiji kyonse ne kanatu wayuka bulongo kyo ubena kuuba.

<sup>7</sup> Ibyepi inge wailenga nakukuba...na kukutumbula, kabiji kuji dokotala wa mwanyike ao wafumatu ku sukuulu amba wakonsha...kechi wa kitumbulapo kala ne. Nangwa byonkabyo, aye mwanyike kabiji walamba, ne suki yanji ya sakulwa, kabiji wamvwala bulongo, na manono, ne byonsetu. Kabiji aye waambile mba, “Amiwa na noona kala mipenyi, kabiji Naomvwa byela byonse ne bintu bikwabo.” Bino obewa wakonsha kwikalako nang’umvwino yapusanako pa kyokyo.

Amiwa nakonsha kutemwa kwikala na dokotala wakala wapitamo mu bya kutumbula bimye byavula, Amiwa kasa kyangye kusaka kuchibiwa ne. Amiwa—Amiwa nasaka kuyuka muntu kechi wafumatu ku sukuulu ne, Amiwa nkeba muntu wapitamo.

<sup>8</sup> Kabiji Umo wakijishamo kupitamo ye Nayuka, wakwita bufuku buno, ke Mupashi Wazhila. Aye ye Ng'anga mukatampe wakwa Lesa kabiji Mufunjishi mukatampe.

<sup>9</sup> Kabiji nobe kubwela-panyuma mu Mbila yami bufuku buno, kufuma mu busapwishi bwa pa Mulungu, ko kuuba mba, abo bakaine Samwela wajinga na Kyambo kya Nkambo, kabiji ne kwitabizha Saulo, mwaana Kishi, kabiji bakana Samwela, ao waimenajileko Mupashi Wazhila, mambo aye waambiletu monka mwamutangijile Mupashi amba ambe. Kabiji byo ebechile pakikye, waambile mba, “Vulukai, Amiwa kechi nakyambapo kintu kiji kyonse kwi anweba mu Jizhina ja Yehoba ne kanatu kyonka Yehoba kyo afikizhe. Kabiji Amiwa kechi na kyendapo mukulubakanya ku meso enu ne. Kabiji kafwako nangwa umo wakonsha kuzhachisha na ubi ne.”

Nobe Yesu byo aambile mba, “Ng'anyi wakonsha kuzhachisha Amiwa na ubi?” Mwamona?

<sup>10</sup> Kabiji aye waambile jibiji, amba, “Amiwa kechi na kiyapo kwi anweba na kulomba mali nangwa bikwabotu ne. Amiwa kechi natambulapo kintu kufuma kwi anweba ne. Pakuuba byonse byo Naamba byajinga bya kubuwame bwenu, abyo byo Naletele kwi anweba kufuma mukanwa ka Yehoba.”

<sup>11</sup> Kabiji bantu bonse bapaine bukamonyi, “Amba kyakine. Byonse bya kine, bino nangwa byonkabyo tubena kukebatu mfumu. Tubena kukeba kwikala nobe ntanda yonse.”

<sup>12</sup> Pano, bufuku buno, Kinembelo kyetu kyaabanya...aye Buuku wa Efisesa, ke Buuku wa Yoshiwa wa Lulayang'ano Lupya. Kabiji ubena kwabanya ne kwikajika mundonda “aba balushijilo.” Pano, ke kubwelulukamotu pa mamineti acheche, pakuuba mba tufike pantu pamo kasa tukyanye kutapa kutanga, kutatwila pa veeleshi wabu 3. Pano, twatana pa Mulungu wapwa bufuku kuuba mba... Lesa mu Lulayang'ano Lwakala wapaine kwi Isalela mulaye wa ntanda ya kukokolokelamo, mambo baikele ke benyi ne bakang'enda. Kabiji bajinga mu ntanda yabulwa yabo, kabiji Lesa walaile kupichila mwi Abulahama amba bakenda...lunkunwa wanji ukenda pa myaka foolo aduleendi mu bantu benyi, kabiji bakamanyikwa, pakuuba na kuboko kwanji kwakosa Aye ukebalupulamo ne kwibatwala mu ntanda yawama ya yulamo mukaka ne buki.

<sup>13</sup> Kabiji, pano, kimye kya mulaye byo kyafikile pepi, Lesa waimenye muntu umo wakwibatwala mu yoya ntanda. Baanga muno mukalashi bufuku buno awa wajinga...wayuka awa

wajinga ng'anyi? Mosesa. Talai, kine, kine kipasha kya Umo wetu awo wapainwe amba etulete mu Ntanda ya mulaye, Kilishitu. Pakino kimye tuji na mulaye, mambo mulaye wetu ke Kukokoloka kwa bumupashi, kya kuuba mba, kwabo kwajinga kukokoloka kwa kumubiji. Kabiji nanchi bailenga ku ntanda yo bakonsha kwamba mba, "Ino ke ntanda yetu, kechi tukiji bakang'enda ne, atweba twaikajikwa, ino ke ntanda yetu, kabiji kuno tubena kukokoloka. Atweba tukabyala nkunwa yetu, majimi a bipangwa, kabiji tukaja mu majimi etu a bipangwa. Kabiji umvwe atweba twafwa, tukashila baana betu."

<sup>14</sup> Oo, byo twakonsha kuya mu iye ntanda, mwaila mizhilo ya buswanyi, nobe Naomi ne Luta, Boaza, kuleta byonse bye, abyo mulongo wetu mu Isalela, aye byo afwainwa . . . kintu kyonse kyo ataile kyafwainwa kukulwa na mukunzhi wamukipasha kyetu. Oo, byo kyawama! Kyakonsha kusenda milungu ne milungu ne milungu ne milungu, kwakubula kufumamo mu yuwe kyapitala, pakuya mukachi kanji. Twakonsha kukasa Baibolo yense monka mukikye, monka muyuwe kyapitalatu umo.

<sup>15</sup> Kabiji, oo, Amiwa natemwa ku Mufunda. Atweba Twamusendanga, ne Kumusenda pa mwaka umo ne afu, kabiji kwakubula kufumamo mu Buuku. Kwikalatu Nanji monka.

<sup>16</sup> Bino, bino, kyajinga kintu kikatampe bingi amba buswanyi, byo kyajinga mba buswanyi mu ntanda kafwako mukwabo ne kanatu mukunzhi wa mumashi uji pepi ye wakonsha kukula abwa buswanyi. Pano, lekai mbikemo kakintu kacheche mumwe ako ko Nakwachileko bufuku bumo, kwi anweba bamaama. Baanga muno balombelelapo batemwe babo, balubilamo? Kijitu bulongo. Abye byo byo biji ne jikwabo, monai, "Buswanyi bwenu." Mwamona?

<sup>17</sup> Paulo wabujile Mwinaloma, waambile mba, "Ketekelai pe Nkambo Yesu Kilishitu, kabiji anweba ne nzubo yenu mukapuluka." Inge anweba muji na lwitabilo lwenu lwa esakana lwa kwimupulusha anweba bene, ikali na lwitabilo lwafwainwa, nangwatu awa nsongwalume alubakane byepi, nangwa awa nsongwakazhi byo aji, bakapuluka nangwa kikale byepi. Lesa, mumusango mukwabo! Inge Aye wakonsha kwibalajika pa nyuma yabo, balala momwa mu kipatela, na kufwa, bakapuluka. Lesa wikilaile. Abo buswanyi! Oo! "Kabiji bakekala konka," byaambile Isaya, "kabiji ne ba mubisemi byabo kasa baji nabo. Abo kechi bakakozhang'ana nangwa konauna mu mutumba Wami wazhila ne, byo byaamba Yehoba."

<sup>18</sup> Oo, Amiwa njina kintu kimo kicheche Naketekela po Nafwainwa kufika bufuku buno, kwimuletela anweba. Kibena kuteematu mu muchima wami, mambo akyo kibena kwiya ku kyokyo.

<sup>19</sup> Bino pano, kuya kulutwe. Pano mwamona Mosesa, awa waingijilenga byakukumya bikatampe abyo byaletele Isalela

kufika mu ntanda, kabiji wibaletele momwa muntanda ya mulaye, bino kechi wapaine buswanyi bwabo kwi abo ne? Aye kechi wibapele buswanyi bwabo ne; aye wibatangijiletu kufika muntanda, pakuuba Yoshiwa ye waabenye ntanda ku bantu. Abyo ibyo nyi? Kabiji ne Kilishitu waletele Kipwilo kufika pa kifulo po bapelwe buswanyi bwabo, bwapelwe kwi abo, kwashalatu kwabuka mukola wa Yodano, pakuuba Mupashi Wazhila ye Iye Wikajika Kipwilo mu ndonda. Aye Yoshiwa waleelo ubika Kipwilo mu ndonda yakyo, na kupana ku umo umo, byabupe, mampuzha, kifulo. Kabiji Aye ye Jiwi ja Lesa jibena kwamba kupita mu bumuntu bwa mukachi bwa yewa ye bapulusha kwi Kilishitu, Mupashi Wazhila. Pano anweba mubena kutambula byobyo byonse nyi? Pano tubena kuya mu Buuku wa Efisesa. Bino, mujishindatu jimo, Aye ubena kwikajika Kipwilo mu kifulo kyakyo. Bino, Yoshiwa wibabikile mu ntanda ya ku mubiji. Kino kimye Mupashi Wazhila ubena kwikajika Kipwilo, mukifulo kyakyo, mu ntanda, amba abo, mu kyokya kifulo kyo bajimo, bo buswanyi bwabo.

<sup>20</sup> Bino, kintu kitanshi kya kutatwilapotu papo, watuma kalata anji, “Paulo, . . .” Akyo, tusakutana palutwe kacheche kuuba mba akye kyonse kyafyamika kya solwelwe kwi aye, kechi ku sukuulu ne, kechi na uji yense wafunda sukuulu wamambo awama ne, pakuuba kyajinga lumwekesho lwa Bulesa lwa Mupashi Wazhila alo Lesa loapaine kwi Paulo. Pakuyuka mba kyafyamika kya Lesa, waambile mba, kyajinga kyafyamika kufumatu ku kintendekesho kya inontanda, kya munsolwejlwe ku Mupashi Wazhila. Kabiji Mupashi Wazhila mukachi ka bantu waikajikilenga umo umo mu ndonda, kwikajika Kipwilo mu kifulo kyakyo.

<sup>21</sup> Bino, kintu kitanshi Paulo kyo atatwile kubula bantu papo, ke kusenda bonse. . . Vulukai, akye ke ku Kipwilo, kechi ku baji pangye ne. Ke kyafyamika kyakatazha kwi aye, kechi mwakonsha kwi kyumvwa ne, kipita peulu ya mutwe wanyi, aye kafwapo nangwa kintu kimo kyo ayukapo pa kikye ne. Pakuuba, ku Kipwilo, ke buki mu jibwe, ke lusekelo lwakubula kukonsha kwamba ne, ke luketekelo lwapeshiwa, po paimena mweo, lo luketekelo lwetu ne bwikalo, ke Jibwe ja Myaka yonse, oo, ke kintu kyawama kyonse. Mambo meulu ne ntanda bikapita, pakuuba Kyambo kya Lesa kechi kikapita ne.

<sup>22</sup> Pakuuba muntu uji pangye ya Kenana kafwako nangwa kintu kimo kyo ayuka pakikye ne, aye ukvendaukatu. Kechi kwaamba mba kechi ke muntu wawama ne, Amiwa kechi naamba kyokyo ne. Amiwa kechi naamba mba mu Ijipita mwajinga mwabulwapo muntu nangwa umo wawama ne, bino aye. . . kanatu waiya wafika mububwe buswanyi.

<sup>23</sup> Kabiji buswanyi, kuuba mba, mulaye wapainwe ku Kipwilo kechi yajinga ntanda ya ku mubiji ne, pakuuba ke ntanda ya bumupashi, mambo atweba twi bung’anga bwa bufumu,

mukoka wazhila. Nanchi pano mu bubwe bung'anga bwa bufumu, mukoka wazhila, bantu bapusanako, baitwa, basalwa, basalululwa, bapatulwako, nanchi ntanda yonse iji pangye yafwa. Kabiji atweba tutangijilwa ku Mupashi. Baana babalume ne babakazhi ba kwa Lesa batangijilwa na Mupashi wa Lesa; kechi ku muntu ne, kana konka ku Mupashi.

<sup>24</sup> Byonse mu butemwe, kitu kyonse kyakaswa pamo. Akye kyaesekwa kufunjishiwa bimye byavula, kabiji kwakubula ne luzhinauko bafunda masukuulu a mambo awama baya kufika palepa kukila ne byo nakonsha Amiwa. Bino kine kintu kyo Nasaka kuleta kwi anweba ke kikye: amba muntu uji mwi Kilishitu, uji na Mupashi Wazhila, wakonsha kutekanishisha muntu umvwe uji mukilubo; kukoka muchima, lusa, butekanye; aye wawama, wikepesha, wakishika, wayulwa na Mupashi; ubula kwibwelamo ne; kimye kyose wakwitabizha; aye ke muntu wapusanako.

<sup>25</sup> Kechi muntutu ne, “Kimye kimo twajinga nakyo. Inge twabijika, nishi tuji nakyo, atweba ba Methodist. Oo, byo twabijikile, twajinga mu Ntanda.” Akyo kyawama, akyo kijitu bulongo, Naketekela kyokyo ne akyo.

<sup>26</sup> Nanchi kwaishile ba Pentekosito kasa bamba na jimi, abo, “Bajinga nanji; yense waambile na jimi wajinga nanji.” Naketekela kyokyo, ne amiwa. Bino nangwa byonkabyo twatana kuuba mba bavula kechi bajinga Nakyo ne, mwamona. Mwamona? Bino baji . . .

<sup>27</sup> Atweba pano tubena kwiya ku kikye kikatampe kyafyamika akyo kyafyamikile kufuma ku kintendekesho kya inontanda kabiji pano kibena kusololwa mu moba akumpelo ku baana ba Lesa. Anweba mwaketekela kyokyo kwikala kyakine nyi, amba baana ba Lesa bansololwa? Kasa tukyangye kuya kuji konse ne, twayai tuzhikule ku bena Loma kyapitala kyabu 8 pa kaminetitu kamo, lekai ne mumweshopo kintu kimo. Monai kana kikye kibena kufikilamo mu byo Mbena kwamba muno. Pano tusakutoola bena Loma 8, veeleshi 19 wa—wa kyapitala kyabu 8 wa bena Loma:

*Mambo byonse . . . abyo bilengwa bibena kutengela  
kasa bizanza meso na kupembelela kusoloka kwa baana  
ba Lesa.*

<sup>28</sup> Nakutengela kasa bizanza meso, bilengwa byonse bibena kupembelela kusoloka. Mwamona, kusoloka! Kusoloka ko kuka? Ke kuyukanyikwa!

<sup>29</sup> Ntanda yonse. Bena Mohamedi kokwa, babena kwikipembelela. Kuzhokoloka konse, konse konse, babena kwikipembelela. “Bajipi baabo bantu?” Twaikalapo kala na . . . Twajinga na lubesha wabaya upupa, twajinga na bilulumo ne kubeshabesha, twajinga na manyi ne mashi, twajinga na bintu bya misango yonse, bino twakakelwe kumvwa aja Jiwi jicheche

ja kebwire ngauzhi ja mumvwetele mu kukumba kabiji waya ne, waambile mba, “Amiwa Bano, Nkambo.” Mwamona?

<sup>30</sup> Pano bilengwa byonse bibena kubiza ne kupembelela kunsoloka kwa baana ba Lesa. Pano, Paulo ubena kubika patanshi Kipwilo ponka po kyafwainwa Kutana. Pano kubwelatu panyuma, twayai tutange jibiji:

*Paulo, mutumwa wa Yesu Kilishitu monka mu kyaswa muchima wa Lesa, ku bazhijikwa (abo bo “bazhila”) baji ku Efisesa, ne . . . bakishika mwi Kilishitu Yesu:*

<sup>31</sup> Pano, pakuuba mba jibumba jikabule kulubamo, tutwela byepi mwi Kilishitu? Twinungako ku kipwilo pakuuba mba tutwele mwi Kilishitu nyi? Bushe twikala basendwe bafunda pakuuba mba tutwele mwi Kilishitu nyi? Bushe twibizhiwa mu meema pakuuba mba tutwele mwi Kilishitu nyi? Tutwela byepi mwi Kilishitu? Kolinda Mutanshi, kyapitala kyabu 12, “Mambo na Mupashi umo,” umo, kisopelo kikatampe M-u-p-a-s-h-i, uji ye Mupashi Wazhila, “atweba bonse twabatizhiwa mu Ntanda ya mulaye.”

<sup>32</sup> Mu ino Ntanda ya mulaye, bintu byonse biji kulubaji lwetu, mu Ntanda ya mulaye. Wikimona, Mulongo Collins nyi? Monai, bintu byonse mu Ntanda ya mulaye! Kimye Isalela kyo baabukile yuwe Yodano, kuya mu ntanda ya mulaye, balwishishe bintu byonse!

<sup>33</sup> Pano vulukai, mu iye Ntanda ya mulaye, kechi kyalumbulula mba obewa wakikizhiwa ku misongo ne, kechi kyalumbulula mba obewa wakikizhiwa ku makatazho ne. Pakuuba kyamba bibye (Oo! Lekai kikye kitwele pazhika.), kyamba bibye, amba ke kyoobe! Imanaitu ne kwikitambula! Mwamona? Kimye . . .

<sup>34</sup> Kabiji, vulukai, jishinda jimo ajo Isalela jo afwishishemo muntu, ke kyakuuba mba umvwe bubi bwatwela mukambi yabo. Ajo jo joka jishinda jo twakonsha kutailamo—lushijilo, ke kuuba mba bubi bwatwela mu kambi, kintu kimo kyangata kuntu kumo. Kimye Akana kyo ayibile katemo ne mukukumba wa kina Babiloni, bubi bwatwelele mu kambi, kabiji ne kondo kechi yaendele bulongo ne.

<sup>35</sup> Anweba mpai kikye—akye kipwilo bufuku buno, aje jibumba ja bantu, bulongotu, jiji bulongo mu mulaye wakwa Lesa, na Mupashi Wazhila, na kwenda mu Mupashi, Nanunusha kikola kiji kyonse nangwa lumanamo luji lonse, nangwatu kintu kyonse kijiko, yense Joe Lewis ujiko mu kyaalo, na kubulwa bukishika bonse, kabiji ne bonse babula kwitabila bajiko, bakonsha kuleta misongo iji yonse nangwatu lumanamo mu kikye kibelo, kabiji bakafumamo batutulu baji bulongo. Ee, mwane. Lesa wapaine mulaye, kanatu bubi bwa kubulwa kwitabila boobwa konsha kwikikanya. Pano tusakuya panshi tumone abwe bubi bucheche bo buka, pa kakimye kacheche. Pano:

. . . abo baji *mwi Kilishitu Yesu:*

*Bupe bwikale ne anweba, ne mutende, kufuma kwi Lesa Taata wetu, kabiji. . . aye Nkambo Yesu Kilishitu.*

*Atotwe Lesa kabiji Shanja Nkambo yetu Yesu Kilishitu, ao witupesha atweba na mapesho onse a bumupashi mubifulo bya mwiulu mwi Kilishitu, mu—mwi Kilishitu:*

<sup>36</sup> Inge tuji mwi Kilishitu, twikala na mapesho a bumupashi. Pangye ya Kilishitu, tuji na ng'umvwinno ya kumubiji. Mwi Kilishitu tuji na mapesho angyalutwe. Kechi bakitabila-mbijinga ne, kechi bafwanyikizha ne, kechi kiji-nobe bekimvwala ne. Bino kikulutu ubena kweseka kwamba mba uji mu Ntanda ya mulaye, bino kasa wabula, bubo bobo bukakufikizhako. Kabiji, kintu kitanshi mwayukatu, uketana obewa mwine mba wiwabujimbijimbi kabiji—kabiji pa byonse, byo twikitela mu ntanda mba, wifyaminatu. Mukatana mba kechi uji na kyo ubena kwambapo ne. Pakuuba inge uji mwi Kilishitu Yesu, Aye wakulaile mutende wa Mwiulu, mapesho a Mwiulu, Mupashi wa Mwiulu, bintu byonse ke byobe. Obewa uji mu Ntanda ya mulaye kabiji uji na bintu byonse. Amena. Byo kyawama! Oo, twyai tufunde:

*Monka mwi aye mo etusalulwijile . . .*

<sup>37</sup> Pano, papo ipo kipwilo po kilubilamo pabaya bingi.

*Monka mwi aye mo etusalulwijile . . . (Mwi Ng'anyi?) Kilishitu.*

<sup>38</sup> Twatana mba pano, kubwela mu—mu Ntendekelo ne mu Lumwekesho, Lumwekesho 17:8, amba Aye witusajile mwi Kilishitu kitendekesho kya ino ntanda saka kikyaangye kwikalako. Pano, kyambo . . . Lekai tange kyalondelapo:

*. . . kintendekesho kya ino ntanda kasa kikyaangye kulengwa, amba twikale bazhila babula kaneneno ku meso anji . . .*

*mambo witutongwejile jimo . . .*

<sup>39</sup> Pano Nasaka kwimana pa kyokyo kyambo kya “kutongwela jimo.” Pano, *kutongwela jimo* kechi kwamba mba, “Amiwa nsakusalako Mulongo Neville, kabiji Ami—Ami—Ami—Ami—Ami kechi nsakusala Mulongo Beeler ne.” Akyo kechi byo kiji ne. Ke kuyukila jimo kwakwa Lesa ako kwayukile ng'anyi ukekala bulongo kabiji ng'anyi ukabula kwikala bulongo. Nanchi, monka mukuyukila jimo, Lesa kuyuka kintu Aye kyo akooba, Aye watongwejile jimo monka mukuyukila jimo Kwanji kulengela bintu byonse kwingijila pamo ku buwame bwa booba batemwa Lesa, pakuuba mba Aye wafwainwa, mu myaka ya kulutwe, kwita bintu byonse mu Umo, awo ye Kilishitu Yesu.

<sup>40</sup> Lekai ndengepo kintu kimo kicheche kya kumwenako papo. Ke kyawama. Tubwele kunyuma, Naketekela Amiwa naambilepo pakikyeye pacheche bufuku bukwabo, nangwa



nafikilepo, mu Ntendekelo, kyapitala kyabu 1, 1:26, kimye Lesa kyo etelele Jizhina Janji, “Yehoba Lesa,” kiji mu kyambo kya El, Elah, Elohimu, akyo kibena kulumbulula mba “Aye waikalako-pabuke bwanji.” Kechi kwajingapo kintu kikwabo ne kanatu Aye. Kechi kwajingapo mwela ne, kechi kwajingapo kyeya ne, kechi kwajingapo tubaangabanga ne, kechi kwajingapo ntanda ne, kechi kwajingapo kintu kikwabo ne. Kyajinga Lesa, kabiji Lesa bunke bwanji, El, Elah, Elohimu. Pano, Aye walengele kikye.

<sup>41</sup> Mukachi ka kikye mwajinga milanguluko ya lumbulwile mba Aye wajinga...Mukachi ka yuwe El, Elah, Elohimu mwajinga mulanguluko nangwa...Anweba mwayuka mwaila *atilibbyuti* nyi, nangwa lekai amiwa ne kyambe muyuwe musango, kyajinga ke “byubilo.” Pakuuba mba mulunda mucheche ekyumvwe, kabiji Amiwa yami umo mucheche usa kikwitambwila mujojo jishinda. Mukachi Kanji mwajinga byubilo bya kwikala Taata, bino Aye waikeleko-pabuke bwanji, kechi kwajingapo kintu kya kuuba mba Aye ekale ke Taata ne. Kabiji, pano, mukachi kakyokya mwajinga kintu kikwabo, amba Aye wajinga Lesa; kabiji ka lesa ke kintu kipopwelwa; bino Aye wajinga waikalako-pabuke bwanji, El, Elah, Elah, Elohimu, nanchi kechi kwajingapo kya kumupopwela Aye ne. Mukachi ka kyokyo, Aye wajinga Mupulushi, bino kechi kwajingapo kintu kyalubilamo kya kupulusha ne. Mwamona? Mukachi ka kyokya, Aye wajinga Lubuko, monai, bino kechi kwajingapo kintu kimo kyakolwa kya kubuka ne, kechi kwajingapo kintu kyafwainwa kukolwa ne. Pano mwikimona kipikichala nyi? Nanchi milanguluko Yanji, byubilo Byanji byaletele bintu bijiko leelo.

<sup>42</sup> Bantu bamo baamba mba, “Kyawama, kika Lesa kyo abujiile kwibilekeshatu konka kutendekelo?” “Aye uji na muchimawanshita wa bumbazhi,” byaambile Joe Lewis, awa wazhachishe Joe, nangwa Jack Coe, mwamona. Waambile mba, “Aye ke mbazhi wanshita-muchima. Kechi kujipo kintu kyakwamba mba Lesa ne. Inge kwajingapo kintu kya musango yewo, Aye wafwainwa kwikala na...” Oo, Ami...Aye bamutelele misango yonse ya mazhina, monai. Bino ke mambotu akuuba mba wakonsha kwikala na maana avula bingi *papo*, bino kechi uji na kintu nangwa kimo mukachi *mumwe ne*.

<sup>43</sup> Pano, amwa, amwa momokiji. Mwamona? Akye Kyambo kibulang’ana mumwe, kabiji Aye wikifya. Kabiji abye byafyamika byajinga byafiwa, vulukai, byo byaamba Baibolo, “Kufumatu ku kintendekesho kya ntanda, na kupembelelatu kunsololwa kwa baana ba Lesa,” pakuuba mba bamweshiwe ku kipwilo. Oo, ami! Mwikyumvwa nyi?

<sup>44</sup> Pano Naimana pa jishimikila jami ka kimye kacheche, nangwa Amiwa nsakuleta...Amiwa nsakuya ku mulanguluko mukwabo pakuuba mba ndete kikye. Pano vulukai, kupita mu

mankulo onse akwa Mosesa, kunyuma kupita mu mankulo a bangauzhi, kunyuma kupita mu mankulo onse, bapembelejile poso ano moba a kulutwe pa kuuba mba abye bintu bimweshiwe, monka mwaila Kinembelo. Abyo ibyo, pakuuba mba kisololwe ku baana bakwa Lesa. Kika? Kufuma ku balubilamo... poso kyaikala nobe pilamenda, nobe byonka byo Ng'amba, kunshimika na kubwela pepi, pepi, pepi.

<sup>45</sup> Nobo Amiwa bimye byavula ng'amba iye ng'ambilo, ya kwamba mba, Lesa walengele ma Baibolo asatu. Mutanshi, Aye Wamubikile mwiulu, ye zodiac. Bushe zodiac mu mumona nyi? Ng'anyi kintu kitanshi kiji mu zodiac? Awa kisungu. Ng'anyi kintu kyapelako muzodiac? Leo ye bonkwe. Aye wayishile kimye kitanshi kwi kisungu, Aye ukeya kimye kya bubiji ke Bonkwe wa kisaka kya Yunda. Mwamona?

<sup>46</sup> Aye walengele walondejilepo mu pilamenda, kunyuma mu moba akwa Inoka, kimye kyo balengele pilamenda. Kabiji be bipima pashikelo. Amiwa kechi ne kikwatakanya ne. Bino kuya ku bibumba, akwa kwakukuluka pakuya na kufukamina mu manungo pa kimye kyabaya, kabiji bakonsha kupima bula bwa bibumba. Mwayuka po bapimina pa kino kimye nyi? Kuyatu kufika ne ku kipango kya mfumu. Kabiji awe pilamenda byo aya peulu... Atweba kechi twakonsha kumushimika ne, na byonse byo tuji nabyo leelo. Atweba kechi twakonsha kwikishimika ne.

<sup>47</sup> Kyashimikwa kuya peulu nobe *bibye*, kufika pantu pamo. Kabiji jibwe ja... Aja jibwe jajikoka kechi ja mwekele ne. Abo kechi babikilepo kitungutungu peulu ya pilamenda ne. Amiwa kechi nayuka kana anweba mwikiyuka nangwa ine, aya pilamenda ikatampe iji mu Ijipita, kechi yajinga na jibwe ja peulu ne. Kika? Jibwe ja jikooka ja sujilwe, Kilishitu, Mutwe wajikooka, monai, wasujilwe.

<sup>48</sup> Pakuuba byo tubena kuya na kukoma kufuma ku nkulo yabena Luther, nkulo ya ba Baptist, nkulo ya ba Methodist, nkulo ya ba Pentekosito, tubena kuya nakufika ku Jibwe ja jikoka, monai, tubena kupembelela kabiji ne kukabila joja Jibwe ja jikoka kwikajikwa, pakuuba mba kishimikwa kipwe. Bushe anweba kechi mwatanga mu Kinembelo ne, "Aja jibwe jasulwa"? Mambo, twavuluka mba akyo kibena kwamba ku tempo wakwa Solomoni. "Pakuuba aja Jibwe jasujilwe jaikala ke Jiine ja jikoka." Bino Amiwa mbena kwamba kikye pakuuba mba ki—ki—ki—kilenge kipikichala kwi anweba.

<sup>49</sup> Bino, kabiji mu Baibolo, tubena kwikala mu juba japelako, peulu ya pilamenda, masabi akilang'anya a kimye kya nkulo ya nkasa mu zodiac, mu kimye kya kwiya kwa Leo awa bonkwe, mu jibwe ja jikoka, kabiji mu moba a kusoloka kwa baana ba Lesa, mu Baibolo, mwamona. Mwamona kimye kyo tujipo nyi? Atweba tujitu ponka pa kimye kyakupelo.

<sup>50</sup> Baanga batanga pepala uno mulungu, bya aambile Khrushchev ne bakwabo? Oo, benengezha; nanchi ne atweba. Amena. Benengezha! Kijitu bulongo, mwamona. Oo, ke—ke—jishuko jabaya, obewa juba! Inge Benakilishitu bakonsha kulangulukatu juba jo tubena kwikalamo! Ami!

<sup>51</sup> Mwalangulukapo ka? Munembeshi wayuwe Buuku, aye wikimwene, kabiji wamwene kimye kyo kikasoloka mu moba akupelako, na kupembelela ne kubiza kwa baana ba kwa Lesa kumwekanyika mu moba akupelako, na bulume bwa Mupashi Wazhila mu kimye kya kumpelo, mu kusolola bintu byafyamikile kufuma ku kintendekesho kya ntanda, pakuuba mba kiletwe.

<sup>52</sup> Pano twayai tubwele kunyuma ku “kintendekesho kya ino ntanda” ne jikwabo, pakuuba mba tutambule lumwekesho, tumone kana tuji bulongo nangwa ine. Naketekela mba Amiwa kechi sakwilengela kwikala wa myendeleko pa kwita Lesa mba, “Papa,” bino Amiwa nasaka kwikyambila momo pakuuba mba mwikyumvwishe bulongo. Papa! Papa wakebelenga baana, nanchi Aye waubile byepi? Waambile mba, “Kwikale ba Malaika.” Kabiji Baishile na kumuzhokoloka Aye. Oo, akyo kyawama. Abo bamupopwejilenga Aye, Aye pano waikela ke Lesa, milanguluko. Vulukai, Aye wajinga El (E-1), Elah, Elohimu, waikalako-pabuke bwanji, kafwako kikwabo ne kanatu Aye. Kintu kitanshi kyamwekele bajinga ba Malaika. Nanchi, Bamalaika kechi baubilengapo kintu kikwabo ne kanatu kupopwela. Kechi bakonsheshe kulubilamo ne. Nanchi, Abo kechi bakonsheshe kukolwa ne, Bajinga bintu bibula kufwa. Nanchi, Aye kechi wakonsheshe kumweshwa bulume Bwanji bwa lubuko ne, Aye kechi wakonsheshe kumweshwa lubuko Lwanji ne. Nanchi pano, kasa tukyangye, pano lekai. . .

<sup>53</sup> Nanchi pa kupwisha byobya, Aye waambile ma, “Tusa kulenga kintu kimweka.” Nanchi Aye walengele ntanda. Kabiji byo Alengele ntanda, Aye walengele byonse bilengwa bya panopantanda, kabiji pano Aye walengele muntu. Bintu byonse byamwekele mu ntanda, kutatula na—na kivube nangwa misango ya masabi abundeleba, ke musango umo wa bintu bitumpauka mu meema, byatatwijile ponkapa, ku. . . kufuma ku byobya kuya ku bombwe, ke musango wa bumi bwapelako bo twakonsha kutana, kyambiwa mba, ke bombwe. Bwapeleshako peulu ke bwa bantu. Kufuma ku bombwe kyatatula kuya ku musobela, kufuma ku musobela ke kuyatu kulutwe ne kulutwe ne kulutwe, kabiji kimye kyonse Mupashi Wazhila kyo atatula kuba mba “whoosh,” kupeema, bumi bwaiya ne jikwabo; “whoosh,” bumi bukatampe. Kabiji kintu kitanshi, kintu kimo kyaishile mu kipasha kya Lesa, awa wajinga muntu. Kafwako kikwabo kyakikalapo ne, kechi kwajingapo ne, kechi kikalengwapo jibiji ne, kintu kyakila muntu, mambo muntu uji mu kipasha yakwa Lesa. Mwamona?

54 Pano ke muntu, kimye Aye kyo alengele muntu Wanji mutanshi, pano, Aye byo alengele bilengwa Byanji bya Bumalaika, Aye walengele muntu, “Wamulengele monka mwi Aye mwanamulume ne mwanamukazhi,” bonse mu kintu kimo. Aye wajinga byonse bibiji mwanamulume ne mwanamukazhi, wa bwanabukazhi kabiji wa bwanabulume. Kimye Aye kyo alengele Adama ne kumubika mu mubiji, vulukai, mu Ntendekelo 1, Walengele mwanamulume ne mwanamukazhi, kabiji mu Ntendekelo 2, kechi kwajingapo muntu wakujima mushiji ne, muntu wa mubiji. Kafwako muntu wakonsheshe kutola kiji kyonse ne kujima mushiji ne, bino nangwa byonkabyo kwajinga muntu mu kipasha Kyanji. “Kabiji Lesa ye...” [Kipwilo kyaamba mba, “Mupashi.”—Waku.]. Abyo ibyo. Mwamona? Aye walengele muntu mutanshi, “mwanamulume ne mwanamukazhi Aye mo ebalengejile.” Pano, byo Alengele mwanamulume mutanshi . . .

55 Pano, vulukai, byonse pamo Aye wajinga nabyo mu milanguluko Yanji. Kabiji Pamulungu bufuku Napichile pa kyokyo. Akyaa—akya kyambo ke mulanguluko wasololwa. Lesa walangulukile Aye byo akonsha kwikala Lesa, Aye byo akonsha kupopwelwa, Aye byo akonsha kwikala Ubuka, Aye byo akonsha kwikala Mupulushi; kabiji bukiji bukiji Aye byo aambile Kyambo, kyajinga kypwa kikupu. Oo, inge babo baana bakwa Lesa bakonsha kukwachijila kyokya Kyambo byobya! Inge Lesa waamba Kyambo, nishi kypwa! Kinetu! Aye wafwajilwe kupembelela . . . Ndonda ya myaka ya bintu byapita yamba mba, nangwa sendwe upesapesa mu mushiji ne bonse, baamba mba kape ntanda yaikala ma milyoni ne mamilyoni ne mamilyoni. Amiwa kechi nayuka ne, kape kyajinga ma tililyoni ne matililyoni a myaka. Amiwa kechi nayuka myaka yapichilepo ne. Lesa kechi wikala mu kimye ne. Aye kimye kechi kyakepelwako na mineti umo kukila Aye kimye kyo Ekyambile. Aye ukijitu Lesa. Kechi kujipo kimye kwi Aye ne.

56 Amiwa kechi nekiyukile byobyo ne poso bufuku bukwabo, nangwa lukeelo, byonkabyo. Peenape, kafwako keesha japita ne, kafwako keesha jikeya ne, byonse bijitu mu bukataata. Bushe mwakimonapo kyambo kya “AMIWA JIIPO”? Kechi “Najinga ne,” nangwa “Amiwa kekala,” ke Peenape, “AMIWA JIIPO,” monai, “AMIWA JIIPO,” kimyetu kyonse.

57 Pano, bino Aye wakebelenga kubika bintu mu kimye. Aye walengele kintu kimo kya kumupowela, nanchi milanguluko Yanji yaletete kikye. Nanchi Aye walengele muntu. Nanchi, mu yuwe muntu, aye wamwekele bu buke. Nanchi, pano, pa kumweshwa milanguluko Yanji ikatampe, kika kyo Ajinga nakyo kipikichala kya Kilishitu ne Kipwilo, Aye kechi watolele buchimba bukwabo ne kulengamo mwanamukazhi ne, pakuuba Aye watolele kufuma ku lubaji lwa kwa Adama, lubavu; kabiji watolele kufuma ku mupashi wakwa Adama, lubaji lwa

bwanabukazhi, ne kubika ku yuwe lubavu. Inge mwamona mwanamulume wa byubilo nobe mwanamukazhi, kujipo kintu kimo kyatama. Kabiji inge wamona mwanamukazhi ubena kukeba kuuba nobe mwanamulume, pajipo kintu kimo kyatama. Mwamona, pajipo kintu kimo kyatama. Ayo ke mipashi ibiji yapusana, yonse pamo. Bino, pamo, balenga kintu kimo, “abo babiji ke umo.” Nanchi Aye walengele mwanamukazhi ne mwanamulume, kabiji kechi bafwaijilwe kukota ne, kechi kufwa ne, kafwako kwikala namwi ne, nangwa pachechetu ne. Bajilenga, batomenenga, balajilenga, nobe byonka byo tuba, bino kechi bayukile biji bubi ne.

<sup>58</sup> Pano Amiwa sakutoloka ponkapo kupembelela lufunjisho lukwabo kimye kimo, lwa pa lukunwa wa muloolo. Akyo, bangipwizhe ami amba ne kivuluke. Bino lekai mone muntu umo eye na kumwesa kintu kimo kyapusanako. Akyo kyo Nakeba kuyuka, mwamona.

<sup>59</sup> Pano, bino pakupita byonse bye, nanchi bubi byo bwatwelele, kika kyamwekele?

<sup>60</sup> Akwa kwine kwalepa, peulu, milyoni, mamailoshi aduleedi milyoni, kuji mpuzha *iji byobya* kubaya, kabiji abwa ke butemwe bwalumbuluka bwa agapao. Kimye kyonse kyo wakonsha kutaya tampulo *kukwe* ku lubaji, ikepelwako na ichi umo. Kabiji mwayuka kimye byo kikala kicheche pakuuba mba kifike pantanda. Ke kivule kya kivule kya bivule. Akyo kyo muji nakyo, akyo Amiwa kyonji nakyo, kivule kya kivule kya bivule bya butemwe bwa agapao.

<sup>61</sup> Mujipo kintu kimo mwi obewa, mujipo kintu kimo mu mwanamukazhi uji yense muno wapitaila pa tweti, mujipo kintu kimo mu mwanamulume uji yense muno wapitaila pa tweti, bimye byakonsha kushalako. Obewa ujitu na myaka faivi, ko kuuba mba kufuma pa fifitiini kuya pa tweti. Pa kupitatu tweti utatula kufwa. Bino, kufuma pa fifitiini, obewa ukijitu mwaana wabula kufikila mu bukulupe kufika pa kyokya kimye. Kabiji pano waikala ke mukulupe wa matweti. Kabiji pa kupitapo tweti, oo, mwaamba mba, “Amiwa jitutu muntu wawama.” Obewa wakonsha kwamba kyokyo, bino kechi byo uji ne. Obewa ubena kufwa kabiji ubena kusokwa na kupwijijika, nangwa ubetu byepi. Lesa wa kulengele kufika pa yoyo myaka, kufuma popo ke kuya na kufwa. Pano kika kimweka? Pano watatula kekuya na kufwa, bino mwi obewa mujipo kintu kimo kyaamba mba, “Amiwa nakeba kwikala eitiini jibiji.”

<sup>62</sup> Pano Nasaka kwi mwipuzhapo kintu kimo. Pano kyabyepi inge anweba mwasemekelwe myaka faivi aduleedi yapitapo, kabiji mwaikalatu na myaka eitiini kufika ne buji leelo? Inge ne wakonsha kwikala wabula bukwasho, na milanguluko yobe ya myaka faivi aduleedi! Bashakulu bakang’enda kasa bakyangye kwiya kuno, kabiji obewa wajingatu inetu mwanyike na

milanguluko ya yewa musango. Kika, kyafwainwa kukuwamina inge wakonsha kwikala wakota kabiji waikala myaka faivi aduleedi. Monai, pajipo kintu kimo kyatama.

<sup>63</sup> Mwaamba mba, “Kyawama, pano Naumvwa bingi bulongo, Mulongo Branham. Oo, Amiwa—Amiwa—Amiwa njina eitiini, Amiwa na myaka sikisitiini, Naumvwa bingi bulongo.” Mutemwe, lekai ne mubuuleko kintu kimo. Wayuka byepi mba bainobe baji na bumi pa uno mineti, inge kechi baji mu kino kipwilo ne? Wayuka byepi mba mulunda nobe nsongwalume mba kechi waipaiwa mamineti acheche apitapo ne, nangwa mulunda nobe nsongwakazhi? Wayuka byepi mba lukeelo obewa kechi ukekala kitumbi mu nzubo yobe ne? Mwayuka byepi mba musakulupukamo mu kipwilo bufuku buno, mumi? Ke kintu kyabula kuyukanyikwa. Kechi kujipo kintu kya shiniikishiwa ne. Inge obewa uji fifitiini, twelufu, naitiini, sebete-faivi, nangwa naite, kuji. . . bintu byonse kechi byashiniikishiwa ne. Obewa kechi wayuka po waimana ne. Bino kasa ukeba kubwela ku fifitiini, eitiini. Kika kikulengela kwikala na yoyo ng’umvwinu?

<sup>64</sup> Pano, inge obewa wabwela ku eitiini kabiji waikala byonkabya, kwakubula kukolwa ne kabiji kwakubula. . . obewa wafwainwa kukeba kwikala na bantu bakwabo, mambo obewa wafwainwa kukila pa kipimo, mwamona. Bantu bakonsha kutwajijila kwikala mu mankulo akwabo kabiji wafwainwa kwikala wabula bukwasho. Obewa kyafwainwa kwikala kyatama kukila pa kipimo kukila byo kyafwainwa inge waya nabo mubukote. Bino kuji kintu kimo kikwita obewa pakuuba mba ukekaleko. Awa ye agapao mucheche, akya kivule kicheche kikulengela obewa. . . Kintu kimo kiji peulu papo.

<sup>65</sup> Pano, bufuku bukwabo, nangwa lukeelo lumo, pa kimye kya sebeni koloko, kimye Mupashi Wazhila, konka ku buwame Bwanji ne lusa Lwanji, basendele kufuma mu yuwe mubiji, Naketekela, Naketekela. Ee, nangwa ine, Amiwa kechi naamba mba, nakatwelele muyoya Ntanda ne kumona booba bantu ne, kabiji bonse bajingatu banyike. Kabiji Namwene bantu balamba bingi bo Nakibula kumonapo mu bumi bwami. Kabiji Aye wang’ambijile mba, “Bamo bajinga na myaka naite. Abo ke bowaitabizhe. Kechi oene mambo ne kyo babena kujijila, ‘Mulongo wami! Mulongo wami!’”

<sup>66</sup> Pano, awa ke mubiji wa bumupashi, kyakuuba mba inge twafwa kechi twikalala kyabulako ne, twikalala ke mubiji. Inge twakonsha, bonsetu, kufwa, inge atomiki mbomba wakonsha kwitutabaula pa yekauno mineti, mu mamineti faivi kufuma pakino kimye twafwainwa kwiyimuna umo ne mukwabo kabiji ne kwipakachilamo umo ne mukwabo, ne kubijika kabiji ne kutwajijilatu, na kutumbijika Lesa! Ee, mwane. Kabiji Mulongo ne Nyenga Spencer baikala muno, Naketekela ke masongola amo abanda bingi muno, ukekala na myaka eitiini, myaka

tweti. Mulongo Neville wafwainwa kwikalatu nsongwalume mwanyike, kabiji ne Amiwa nakonsha kwikalatu mwanyike. Kabiji tukekalatu... Abo kine byo buji Bukine. “Inge uno tabbanako ye twaikalamo wapopololwa, tuji na umo ubena kupembelela.”

<sup>67</sup> Inge kamwaana kalukeke kapona kufuma kwi inako, mwaila kusemwa ku mubiji, kamubiji kako kaminyangala kabiji mikupa ikilauka, kabiji ne bikwabotu. Ndekelaiko mambo pa yoyo ng’ambilo, anweba banabakazhi banyike. Bino, umvwe kauba byo byo, kaji na misunyi ya bumi ibena kusunyauka. Pakuuba umvwe kaiya pantanda, kintu kitanshi, kakwatakanya mpemeno, kabiji pekala mubiji wa bumupashi wa kisemwa wiiya muyewa mwaana ponkapatu. Kalekaitu bunke, kakatola mutwe wako muचेचे ne kukosela ku jibele ja inako kabiji katatula ne kwamwa. Inge kabula kuba kyokyo, mukaka kechi wakonsha kwiya ne.

<sup>68</sup> Mwakimonapo kaana kang’ombe byo kasemekwa, ke... bukiji bukiji inge katambulatu bulume bwafwainwa pakuuba mba kemene ku mauu? Ng’anyi wikabuula? Kendatu bulongo kuya kwi inako, katatula kuzhokoloka kabiji katatula ne kwamwa. Oo, ee!

<sup>69</sup> Mambo, umvwe awe mubiji wa patanda waletwa pano, kuji mubiji wa bumupashi winengezhezha jimo. Kabiji ponkapotu yuwe... Oo, aleluya! “Kabiji umvwe uno tabbanako wa panopantanda mo twaikala, akwa kuji mukwabo uben kupembelela.” Ponkapotu byo tufuma muyuwe, tuya mu yewa; umo ubula kukeba kutoma meema atalala, kechi ukeba kutoma meema ne; umo ubula kuja, abo kechi ba lulwe lukungu lwa pantanda ne. Bino ko ijitu yakine, kabiji yakosha kukwata ne kwimuna mu maboko, kabiji ikalaitu na butemwe ne byonse bikekala byalumbuluka. Kabiji awa mubiji ubena kupembelela konkwa. Ke lubaji lwakyo. Paji bisatu bya mwiabo.

<sup>70</sup> Obewa utatula lwendo lobe lwa Bumi Bwapeenape kimye kyo uji kuno kukitapisho. Konka kuno kokwakutatwila Peenape. Oo! Obewa watatula Bumi Bwapeenape ponkapano. Nanchi wasemwa jibiji, mwaana Lesa. Kabiji umvwe wafwa, utatula... Umvwe lufu lobe lwakutana muyuwe mubiji kabiji muchima waleka kupema, kabiji mawilo a bumuntu atatula kwimana, akya kivule kicheche kyajinga kivule kya kivule, mu sekondi umo kikala ke kivule kya kivule, pano kyalondelapo kikala ke kivule, kyalondelapo kikala kyazhimang’ana pachechee, kyalondelapo kyaikala ke kakola, kyalondelapo ke mukola, kabiji kikwabo kyalondelapo kikala ke kalunga kakatampe ka meema, kabiji pakupitapo kimye kicheche obewa wimana mu kyeenyi kya batemwe bobo baimana kokwa, bamvwala bivwalo bya mibiji ya mwiulu, kyakuuba mba mwakonsha kwiyuka umo ne mukwabo, kutemwa umo ne mukwabo, waalulwa ke mwanamulume mwanyike ne mwanamukazhi mwanyike jibiji.

Kine ibyo. Aye ukapembelela kokwa poso kwiya kwa Nkambo Yesu. Kabiji juba jimo awa mubiji walukumo Wanji. . . Pano vulukai, awa ke mubiji wa mwiulu, kechi walukumo ne, mubiji a mwiulu. Kabiji juba jimo awa mubiji wa mwiulu ukafuma Mwiulu pamo ne Yesu.

<sup>71</sup> “Mambo Amiwa naamba kikye kwi anweba,” Tesalonika Wabubiji, kyapitala kyabu 5, nangwa Tesalonika Mutanshi, kyapitala kyabu 5, kimo nangwa kikwabo, “Naamba kwi anweba, Amiwa kechi nasaka namba mulube kino ne, balongo, na mambo aboba balala mutolo, kechi mube bulanda ne, byonka biji bamo babula luketekelo. Mambo umvwe twaitaba mba Kilishitu wafwile ne kusanguka juba ja busatu, byonkabyo ne abo baponena mu tulo mwi Kilishitu Lesa ukebaleta pamo ne Aye mwine. Mambo kino twimwambila mu byambo bya Nkambo, namba atweba tukatanwa bomi pa kwiya kwa Nkambo, kechi tukatangilapo ne nangwa kukanya” (kyambo kyawama) “kukanya boba balala mutulo bashala panyuma ne. Mambo ntolopita ya Nkambo ikavuma, kabiji ne bafwila mwi Kilishitu bakasanguka patanshi.” Aaye mibiji ya mwiulu ikekila panshi ne kumvwala wa panopantanda, mibiji ya lukumo. “Kabiji atweba tukatanwa bomi ne kushalapo tukalulwa mu kakimye kacheche, nobe kukopa kwa jiso, tukashikulwa nabo pamo, mu kusambakana nanji Nkambo mulwelele.”

<sup>72</sup> “Amiwa kechi katomako jibiji ku kikye kipangwa kya mung’azang’aza ne poso Amiwa kekije ne anweba mu Bufumu Bwaba Taata,” Kijilo kya Masongola. Mambo payoya myaka isatu na afu anti-kilishitu ukapwisha bufumu bwanji, ntanda yonse ikonaunwa, Bayudeya baketwa, Yosefwa ukemweshwa aye mwine ku Bangetila, nangwa ku Bayudeya. Vulukai, kimye Yosefwa kyo emwesheshe aye mwine ku balongo banji, kechi pajingapo nangwa umo mu Ngetila ne. Byo atumine. . . Mwayuka jishimikila. Yosefwa, kipasha kya Kilishitu, mu musango yense. Kabiji Yosefwa byo atumenye ku balongo banji, kabiji bayishile, kabiji watajile ne kumona Benjaminina wamuचेche, kabiji aye wi bamwene popa kabiji nanchi aye. . . Baambile mba, “Kika, awe mulongo! Atweba—atweba kechi twafwainwe kwipayaya mulongo wetu ne, Yosefwa.” Aba Bayudeya bamwene mba bauba kilubo; pano kimye Kilishitu, Aye byo esolwelenga Aye mwine kwi abo. Kabiji Yosefwa wayujilwe bingi, wajijile ne kujila, pepitu, nanchi wafumishemo mukazhi wanji ne baana, kabiji bonse bamalonda ne byonse byashala, wibatumine mu kipango. Kine ibyo. Kabiji mu kyeenyi kya Bayudeya bunke, aye waambile mba, “Amiwa ne Yosefwa, mulongo wenu. Amiwa ne mulongo wenu.” Kabiji nanchi baponene ne kutatula kuzakama, ne kwamba mba, “Bino twayuka mba tusakwikimo, mambo twaipaile mulongo wetu. Twaamba mba twaipayile mulongo wetu, kabiji pano yeyuwe mfumu mukatampe.”



73 Aye waambile mba, “Lesu wikyubijile mwingilo umo, kupulusha myeo.” Oene mambo Lesu kyo ekyubijile, mu kupulusha atweba ba Bangentila. Bino Bangentila bajinga mu kipango. Aleluya! Byo bamukaine balongo Banji, Yosefwa, Aye wasendele Musongwa; kabiji ne Musongwa wajinga mu Ngentila, kechi mu Muyudeya ne. Kijitu bulongo.

74 Pano, kwepi ko mubena kuya? Panyuma ya kumvwala yuwe mubiji walukumo, kabiji ne nkulo ikatampe ibena kwiya; inge yuwe mubiji walukumo, awe mubiji wa mwiulu waalulwa ke wa lukumo. Mwaumvwa Amiwa mo nekitazha nyi? Nanchi Nakonsha kwenda kuya na kwamba mba, “Mulongo Neville!” Lekai ne mubule kyakumwenako kicheche. Amiwa naamba mba, “Mulongo Humes, twayai tuye kwiulu ku Bataata lukeelo luno.” Aye ye Lesu. Twamuyuka Aye pano, Aye ke Mupulushi, Aye ke Ubuka.

75 Kechi kwajingapo kintu kya kwamba mba kulenga bubi. Akyo kechi kyaubilwe bulongo ne, kyaubile nyi? Bubi kechi ke kilengwa ne. Ine, mwane! Bubi ke kintu kyo batazhatu mungi. Kujitu Mulenga umo, ao ye Lesu. Bubi ke bololoke bwa alulwa. Bukende kyo kika? Bololoke bwa alulwa. Nga bubela kyo kika? Ke bukine bwatwalwa mungi. Kyakine. Kyambo kya kufinga kyo kika? Ke mapesho akwa Lesu aalulwa ke kyambo kya jifingo kwi Lesu, mukifulo kya mapesho. Bubi kechi bwalengelwe ne. Bubi ke kintu kyatwalwa mungi. Nanchi, Satana kechi wakonsha kulenga bubi ne, aye watwajiletu mungi kyalengele Lesu. Abyo kine ibyo. Lufu ke bumi bwatwalwa mungi.

76 Pano, monai kikye—monai kikye. Nanchi Amiwa kabuuka, kabiji Amiwa kaamba mba, “Mulongo Humes, obewa ne Amiwa twayai, ne Mulongo Beeler kabiji ne balongo bakwabo, atweba tukaya kwi Papa Lesu. Kabiji, ne kwamba mba, twayai tuye lwendo lucheche. Anweba bansongwalume mwatemwa mitumba umvwe. . .”

“Ee, kine twajikuuba.”

77 “Oo, kuji mamilyoni mailoshi avula kokwa mu yoya ntanda ipya. Yaingatu kulutwe, na kupitapo.”

78 “Amiwa nafwainwa kuuba. . .? . . . juba pa juba, jiiya peulu. Amiwa nkemumvwa. Mukimye kyo babena kwambapo, Amiwa nkomvwa.” Isaya 66. Abyo ibyo.

79 Kabiji mwayukatu, Amiwa mbena kwenda kupita mukachi, atweba bonse tubena kwenda kupita momwa pa myaka faivi aduleendi, kalwendo kachechetu, milyoni umo, kechi kijipo na lupusano ne, mwamona. Kabiji pano—pano akyo kyumvwanika nobe myendeleko, bino kasa kiji bukine. Monai, ke bukine, mambo kechi kujipo kimye ne, ke Peenape. Kabiji Amiwa inge naya konka, Naenda kuya nakufika kokwa, kabiji mwayuka bo Na—Na—Nakumenye kokwa nyi? Naamba mba, “Kyawama, inge kokwa kechi kuji Nyenga Georgie Bruce ne! Kika,

Nyenga Georgie, papita kimye kyabaya bingi kufuma po Nakumwenejile.” Kyamweka nobe aye kimye kyonse. Mwamona? Aye wakonsha kwikala myaka teeni milyoni, bino wikalatu mwanyike byonka byo ajinga. Aye wakonsha kukwanya muntu umo pa nyuma, kabiji Natalako, ke Kizumbuzumbu, ne bonkwe.

Naamba namba, “Uji byepi lukeelo luno, Kizumbuzumbu?”

<sup>80</sup> “Myaau,” nobe mpushi. “Oo, Amiwa nafikako ne kwisamba na bamo banyenga kasa baji ku maluba akatampe kokwa, twaikala kokwa pepi nobe myaka faivi aduleendi, mwamona, na kukeketa.” Pano, akyo kyumvwanika myendeleko, bino kasa buji bukine. Akyo kine. Ajo jo jishinda Lesa mo atongwejile mba kikekale byonkabyo.

<sup>81</sup> Kyawama, muchima wenu apeshiwe, Nyenga Georgie. Kafwako bulwanyi bwakonsha kwiya ne, nangwa pachechetu ne. Mu kimye kya mabaanga tukaya peulu ya mutumba, kabiji ne kwamba mba, “Anweba Papa Lesa, Amiwa kimye kimo najinga walubilamo. Oo, Amiwa kimye kimo najinga mumateshi a bubu, Papa Lesa, kabiji Anweba mwapulwishe ami.”

<sup>82</sup> Kika, bantu beseka kumweshwa kyokyo bavulang’anoko. Kyawama, muntu wanembele veeleshi wapelako wa *O Butemwe Bwa Lesa*, kyanembelwe pa kibumba kya kipamo kya bakonye, wakebelenga kulondolola butemwe bwa Lesa. Byo aikijile Aye pakuuba mba apulushe bandengamambo, kabiji byo ekyubile Aye, butemwe Bwanji bwaishile panshi na kwi mupulusha anweba ne Amiwa. Ambai pa bupopweshi, Bamalaika kechi bayukapo kintu nangwa kimo pa kikye ne! Bupopweshi, Malaika wayukatu. . . Aye wimana byobya na kubakamisha byapi Byanji kunyuma ne kulutwe, kabiji ne bushiya, “Aleluya! Aleluya!” Bino, oo, lusa! Umvwe kyafika pa kuyuka mba Amiwa nalubile kabiji pano Nabwela, Najinga wafwa, Amiwa ne mumi jibiji! Anweba Lesa, Amiwa najinga bubu, Najinga mateshi, kabiji Najinga ponka pakishala!

<sup>83</sup> Akino kyo kyawama bumi kyo bwafwainwa kupana kwi obewa. Bushe wakiyapo kala ku kishala kya Kongeti nyi? Ke mpuzha yakila mukunuka ayo yo Nakifikako kala. Abwa bwishi bwakala bundengelatu amiwa kukolwa inge bwanukila. Kulala panshi momwa mu bwishi bwakala, kikulengela kukolwa bingi munda mobe, kutatwila mukachi ne pangye, panyuma ya kutoma manyi a kasita. Monai, waikalatu wakolwa monka mo kyafwainwa kwikeela! Kabiji bapuku babena kunyema konse konse, nakukeba kukuja obewa. Kabiji abwa bo bonka bumi bwawama bo uji nabo. Kabiji muntu umo waiya panshi wakutola. Kabiji wiwakota bingi kechi wakonsha kwikwasha obewa mwine. Kabiji bakutola ne kukwalula ke nsongwalume wa myaka-yafika-eitiini, kabiji bakubika peulu ya mutumba, bonka bumi bwawama bingi, ami, pemeno ya mwela wawama byobya, meema awama atalala. Obewa wakonsha kutemwa

kubwela ku kyokya kishala jibiji nyi? Ine, ine, ine, ine kechi wakonsha kubwela ku kyokya kishala jibiji ne.

<sup>84</sup> Pano, akyo byo kyalumbulula, mulunda. Akyo kyo kyokya kimonwa, nangwa kwalulwa, monse mo kyaikela, kimonwa. Amiwa nakonsha kwamba mba kimwesho, mambo Amiwa njina moyo wa kwikyamba mba kwalulwa, abyo byokyajinga. Pano, apa ipo Lesa. . . byaubile Lesa pakuleta baana babalume ne babakazhi kwi Aye. Pano, abo bantu bobang'anyi? Abo kyajinga byepi. . . Abo bantu baubile byepi pakuuba mba bafikilemo mu kikye? Abo bekyubile byepi? Lesa, pa ntendekelo, Malaika saka akyangye kulengwa. . . Baanga bayuka mba Aye kechi uji nampelo ne? Inge Aye kechi byo aji ne, Aye nishi kechi ke Lesa ne. Nanchi, Lesa, mu lusa Lwanji lubula kupela, Aye wamwene mba Lusifa ukoba kyokya, inge Aye walengele kikye. Aye wibabikile pa bumuntu bwakwisalulwila, muye musango. Kabiji obewa ukiji byonkabya, abyo ibyo, kichi kya byawama ne byatama kyabikwa kulutwe yetu bonse, obewa wafwainwa kusalulula obewa mwine. Kabiji Lusifa wajinga mutanshi kuya mu jishinda jingi. Kabiji aye watatwile kukokela kulubaji lwanji, kwitemwa, kweseka kusenda byonse ke byaji, kukeba kunyachijila muntu mukwabo. Kabiji apo ipo po kyatatwijile. Pano, telekai ku kikye. Apo ipo bubi po bwatatwijile. Lesa, mu milanguluko Yanji ibula kupela, wikimwene, kabiji wamwene jishindatu jimo. . .

<sup>85</sup> Pano, anweba mwaketekela mu balesa basatu, Amiwa kechi mbena kukeba kwimukozha ne, bino mung'anyi Jizhina ja Kyambo kyawama kya Lesa mo mwafwainwa kubika Yesu kwikala muntu mukwabo wapusanako na Lesa Aye mwine? Inge Yesu wakonsha kusenda muntu mukwabo ne kumulenga aye kuya na kufwa, pakuuba mba akuule awe muntu papo, Aye wakonsha kwikala muntu wabula koloka. Kujitu jishinda jimo Lesa jo akonsha kwikyubilamo, ke kusenda kifulo Ayemwine! Kabiji Lesa waalukile ke muntu pakuuba mba Aye atompe kutanta kwa lufu, mu kufumya lumuna ne lufu pe atweba, pakuuba mba atweba twafwainwa kukulwa ku Wetu Atweba bene. Oene mambo Aye kyo bakamupopwela. Yesu wajinga muntu, kine Aye byoajinga. Aye wajinga muntu, m-u-n-t-u, wasemekelwe ku kizungu Maliya. Pakuuba Mupashi wajinga mwi Aye wajinga Lesa kwakubula kipimo ne, mwi Aye mwaikela kuyula konse kwa Bulesa mu mubiji. Aye wajinga Yehoba-yeumwena, Aye wajinga Jehovah-rapha, Aye wajinga Yehoba-muntu wakokela, Aye wajinga Yehoba; Jikebo jetu, Bukikizhi bwetu, Lubuko lwetu; Aye wajinga Alefwa, Omega, aye Ntendekelo ne Mpelo; Aye wajinga Mutanshi, Wapelako; Ye Wajingako, Ye Ujiko, kabiji Ye Ukeya; aye Muzhazhi ne Kisaka kya Davida, Ntaanda Wakumakya, kika, Aye wajinga Byonse-mu-byonse. Mwi Aye mwaikela kuyula konse kwa Bulesa mu mubiji!

<sup>86</sup> Kabiji lufu kimye kyonse lwajinga na lumuna, ye lwaasanga bantu, "Aa," diabola waamba mba, "Amiwa nakukwata,

mambo watelekele kwi amiwa. Nsakukwasa obewa, Amiwa nsakukubika mu kilende. Aa mashi a mukoko kechi akonsha kupana bukwasho kwi obewa ne, ao ke mashitu a nyama.” Bino Lesa, mu maana Anji, wayukile mba kukekala Mwanamukoko ubena kwiya, ao waipailwe kufuma ku kintendekesho kya ino ntanda. Ee, mwane. Kabii abo. . . Aye wapembejile kyoka kya kimye, pakuuba mba kimye kyafikilamo kifikizhiwe.

<sup>87</sup> Bino juba jimo kimye awe Mwanamukoko byo aishile, awe Muntu, Satana wacosamikilwe. Aye wamutajile Kuzhokoloka, waambile mba, “Inge Obewa wi Mwaana wa Lesa, ubapo kyakukumya ne amiwa kumone Obewa wi kyube. Leka ami kumone Obewa wi kyube. Uu-uu, Amiwa nsakumukasa lutambo ku meso Anji, ne kukwimba lupi Obewa. Inge Obewa wi ngauzhi, tubule Obewa wajikukwimba ng’anyi.” Hum! “Amiwa kechi—Amiwa kechi naketekela mba Obewa yobe iye Muntu ne. Inge Obewa iye, tubule patokatu Obewa byo uji.” Monai, bonse byonkabya. “Oo, tubule Obewa yobe!” Aye kechi waasamwine kanwa Kanji ne. Oo, oo, bushe Aye wabikilepo butonge pa meso anji!

<sup>88</sup> Aye watajile ku mwana wabwanga, kabiji waambile mba, “Amiwa nakonsha kwamba ne Ba Taata kabiji Aye wakonsha Kutumina mazhita a Bamalaika, inge Amiwa nasaka.” Pilato kechi waumvwine kyokyo ne, mwayukatu.

<sup>89</sup> “Inge Obewa wi! Inge Obewa wi. Oo, awa kechi Iye ne. Kika, mumonai Aye byo abena kunokola. Hey, anweba bamo bashilikale yainga konka na kumushipila mu kilungi Kyanji.” Kushipila, kumwendeleka Aye, na kukoka myevu kufuma mu meso Anji. “Oo, Aye kechi wakonsha ne! Pano, awa kechi Iye ne! Amiwa nsakutwezha lumuna mwi Aye, mulunda. Amiwa nsakumukwata Aye kokwa. Amiwa pano Obewa nakukwata!”

<sup>90</sup> Byo Abijikile kyapeleleko, “Eli! Eli! Lesa Wami! Lesa Wami!” Awa wajinga muntu. “Kika Anweba kyo mwandekela Amiwa?”

<sup>91</sup> Mu bujimi bwa Ngesemani, kushingwa kwa manyi kwafumine pe Aye, mwayukatu, Aye wafwile nobe mubi. Aye wafwile ndengamambo, mwayuka kyokyo; kechi bubi Bwanji ne, pakuuba bwami ne bwenu. Apo abwa butemwe po bwatwelelamo, Aye byo asendele bwami! Oo, Aleluya! Aye Byo asendele bwami!

<sup>92</sup> Kabiji Aye byo ajinga, Aye kechi waasamikile kanwa Kanji ne. Lumuna waambile mba, “Obewa wayuka, Amiwa naketekela mba awa wajingatu muntu. Aye kechi wasemekelwe mu bukisungu ne, mambo Amiwa naasa lumuna mwi Aye.”

<sup>93</sup> Kabiji aye waishile, wabikile lumuna wanji mwi Aye, bino akya kyajinga kimye kyatama, mulunda! Aye lumuna wanji wafumishiwemo. Aye kechi wakonsha kwasang’ana kufumatu kyokya kimye ne, washile lumuna wanji monkamwa.

Wasangukile pajuba jabusatu, kabiji waambile mba, “Amiwa Yami wafwile, kabiji nji na bumi jibiji, kabiji ne mumi myaka ne myaka, Amiwa njina bakii balufu ne kalunga kalufu.” Ee, mwane. Aye wakakelwe kumona Awe kana wajinga ng’anyi. “Kabiji mambo Amiwa njina bumi, ne anweba mukekala na bumi. Kechi kya kimweka ne. . .”

<sup>94</sup> Juba jimo, pa kupitapo moba asatu nangwa foolo, panyuma Aye waya kwi Bashanji, wabwelele kunyuma, nanchi bamo baambile mba, “Oo, Aye ke. . . Aye—Aye wafwainwa kwikala mwenyi. Aye wafwainwa kwikala kintu kimo kyatama pa yewa Mulunda. Kabiji atweba. . . Anweba Mwamumwene. Anweba mwamona kimwesho.”

“Ine, Aye wajinga Yesu wakine.”

<sup>95</sup> Tomase waambile mba, “Lekai ami mone maboko Anji ne bintu byonse, Amiwa sakwimubuula inge byo kiji.”

<sup>96</sup> Aye waambile mba, “Amiwa Bano.” Waambile mba, “Anweba mujipo na jisabi ne shinkwa koko nyi? Ndetelaipo Ami ka shinkwa.” Kabiji Aye bamuletejile ka shinkwa, kabiji Aye waikela byobya ne kuja waja. Waambile mba, “Pano, bushe mupashi uja nobe Ami byo mbona kuja nyi? Bushe mupashi uji na mubiji ne bikupa nobe Amiwa byonji nyi?” Mwamona? Aye waambile mba, “Amiwa yami Iye. Amiwa yeyewa.”

<sup>97</sup> Kabiji Paulo waambile mba, “Kechi kyakiyukanyikwa ne musango wa mubiji ye tukekala naji ne, bino twayuka mba tukekala na mubiji nobe Wanji.” Kika? Bushe Aye wakikelepo nayewa mubiji wa bulukumo? Ee, mwane! Kimye kyo Afwile, aye Baibolo waamba mba “Aye,” ke ng’ambilo yakutazha ku bumuntu ne jikwabo, “Aye waile ku kalunga kabafu na kusapwila ku myeo yajinga mukaleya.” Aleluya! Aye Wikyubile byepi? Aye wajinga na masesi kumvwinako pa mubiji, Aye wajinga na masesi a kutelekelako, Aye wajinga na masesi a kwambilako, Aye wasapwijile kasa aji na mubiji umotu Ye namwene na boba babulukumo abwa bufuku. Aye wasapwijile ku myeo yajinga mu kalunga ka bafu, babujile kulapila mu kimye kya kukooka muchima mu moba akwa Nowa.

<sup>98</sup> Pakuuba Aye byo asangukile pa Esita, kechi kyakonshekele amba awa mubiji amone bubole ne, mambo Davida aye ngauzhi wikimwene, “Amiwa kechi ka muleke mweo Wanji mu kalunga kabafu ne, nangwa Amiwa kechi kaleka Awa Wazhila Wami kumona bubole ne. Nangwa byonkabyo mubiji Wami ukakokolokela mu luketekelo, mambo Aye kechi ukasha mweo Wami mu kalunga kabafu ne, nangwa Aye kechi ukaleka Awa Wazhila Wami kumona bubole ne.” Kabiji pa maawala sebetetu kubola kasa ku kyangye kufika ne, awa mubiji wa bulukumo, awa mubiji waile na kusapwila ku myeo yajinga mu kaleya, aya yabujile kulapila mu kukoka muchima kwa moba akwa Nowa, wasangukile jibiji, kabiji ufwa wamvwajile ubula kufwa, kabiji

Aye waimene ne kuja Wajile, kabiji Aye witubuujiile mba Aye wajinga Muntu. Aleluya!

<sup>99</sup> Abyo Aye byo byo tukamumona, Mulongo Evans. Abyo Aye byo akekala pa jitanda ja Davida. Aleluya! Akyo kyo kimye kyo tukendauka, Amiwa kenda nenu kupita mu mitumba pa myaka milyoni, mwamona, ke moba achechetu, ke mamineti achechetu, tukabuka kuya kubushiya kokwa, ne kwikala konka kwa.

<sup>100</sup> Kabiji kyaishile ke kimye kya kuja, mwayukatu, kintu kitanshi mwayukatu, Nyenga Wood waambile mba . . . Naambile mba, “Nyenga Wood, kyawama, kwepi ko mwajinga kyonse kye kimye? Amiwa kechi na kumonapo . . . kyamweka kwi amiwa nobe mamineti fifitiini.”

“Oo, aya ke myaka masauzande abiji apita kunyuma, Mulongo Branham.”

<sup>101</sup> “Uu-uu. Ukena kumvwa byepi?” Oo, mambo kechi wakonsha kumvwa kintu kingi ne kanatu kyawama.

<sup>102</sup> “Kwamba mba, iyai kuno, bansongwalume, Amiwa nsakwimumweshwa bonse kintu kimo, balongo, batemwe balongo bami. Apano paji nsulo ya meema, awamisha omukyanye kutomapo. Kabiji, oo, tukatambula awama akutoma atalala. Amiwa kafikako ne kutambula kizanza kikatampe kya magelepu, kabiji atweba bonse tukekala panshi ne kwikija.” Bushe kyokyo kechi kikekala kyawama nenyi? Abyo kine byokiji. Akyo ikyo.

<sup>103</sup> Twikitambwile byepi kikyeye? Twikiyuka byepi? Lesa, kintendekesho kya inontanda kasa kikyanye kwikalako, witutongwejiile jimo atweba! Ng’anyi? Aba baji mu Ntanda yamulaye.

*. . . witutongwejiile jimo mba nkebalule ke baana ami mwine mwi Yesu Kilishitu . . . monka mo kyamutokela ku muchima wanji,*

*Mu kuleta lutotelo lwa kutota lukumo Lwanji . . .*

Pakuuba mba atweba tupane lutotelo kwi Aye nobe byonka byo aambile Aye. Abyo byo Ajinga, Lesa. Atweba tubena kukeba kupana lutotelo kwi Aye.

*. . . lutotelo lwa kutota lukumo lwa bupe bwanji, mo monka mo etulengela kwikala baitabilwa mwi aye mutemwe. (Mwi Kilishitu mo twaitabilwa.)*

*Mwi aye mo muji bukuzhi bwetu bwa mu mashi anji, lo lulekelo lwa b-u-b-i . . .*

<sup>104</sup> Nafwainwa kubwela ku kwalulwa ke baana, bino Amiwa nakeba kwimana pa “bubi” papo minetitu umo. “Bubi,” mwajikumona kyokyo nyi? Anweba mwayuka mba Lesa kechi uzachisha mubi pa kuuba bubi nenyi? Aye umuzhachisha mambo a kwikala mubi. Inge mubi wapepa fwesho, Aye kechi

umuzhachisha pa kyokyo ne; aye ye ndengamambo, nangwa byonkabyo. Mwamona? Mwamona? Aye kechi uji na bubi ne, ndengamambo kechi uji nabo ne. Aye ye ndengamambotu, monai, aye kechi ujipo na bubi ne. Bino uji na bubi, anweba Benakilishitu. Mwamona papo ubena kwamba ku Kipwilo. Kilamaitu bulongo. Mwamona? Mwamona? “Lulekelo lwa mambo,” b-u-b-i. Atweba tuba bubi. Pakuuba mubi ke mubitu, Lesa kechi umulekela mambo ne.

<sup>105</sup> Pano, mwaamba mba, “Kyawama, waile na kuloza muntu. Anweba musakubapo ka pa kikye?” Ao kechi o mambo ami ne. Amiwa kechi ne wakubwezha bintu ne, Amiwa ne musapwishi. Mizhilo ikayuka byakuuba na kyokyo, abo babwezha bintu byo byaji. Abo baji. . . “Kyawama,” mwaamba mba, “aye walengele bukende.” Akyo, akyo—akyo kiji na mwaila mizhilo. Akyo kiji pakachi kanji na mizhilo. Ami—Ami—Ami—Amiwa kechi ne wakubwezha bintu ne, Amiwa kechi mbwezha bantu ne. Amiwa keba mba balululwe. Amiwa ne musapwishi, monai, mwingilo wami ke wakumuleta kwi Lesa. Inge walengele mambo, awa ye mwingilo wanj, aye ke ndengamambo. Lesa umuzhachisha pa kipimo kyabaya. Kyakutatwilapotu aye ke ndengamambo, kyakutatwilapotu wazhatwa kala. Aye kechi watatula kufika ne patampulo itanshi ne, aye—aye—aye kechi ujipo nangwa na kintu kimo ne. Kyakutatwilapotu aye ke ndengamambo. Aye kechi uji na bubi buji bonse ne, aye ke ndengamambo.

<sup>106</sup> Obewa kechi wakonsha kuya kungi na kwamba mba, “*Abwe* bufuku bwanema, kabiji *abwe* bufuku kechi bwanema ne.” Ine, ke bufuku bonse, ke bufukutu bonse. Abyo Lesa byoyo aambile. Abyo ibyo, aye ke ndengamambo, byo byonka. “Pano, aye waubile bibye, *abwe* ke bufuku bwanema, *abwe* ke bufuku bwatoka bingi ponka pano.” Nayuka, bino ke bufukutu bonse, byo byonka. Mwamona?

<sup>107</sup> Amiwa kuuba naamba mba, “*Akye* kyeya kyabaya ponka pano.” Ine, kyonsetu ke kyeya, mwamona, ke kyeyatu, kechi wakonsha kwamba byo kyabaya ne. Mwamona? Bino inge aye ye kibazhi kifita mu *kikye*, nishi muji fishi mwi akyo.

<sup>108</sup> Nanchi “bubi,” b-u-b-i, twalekelwa bubi bwetu monka mu Anji (kika?) Mashi, Mashi anema.

. . . *mwaila bunoshi bwanji* . . .

<sup>109</sup> Twakonsha kwikilubako byepi? Mambo atweba twibafwainwa, twaublepo kintu kimo pakuuba mba bubi bwetu bulekelwe? Kyanji kika?

. . . *lusa*;

<sup>110</sup> Oo, ami! Kafwako nangwa kimo mu maboko ami kyo naleta Amiwa ne, Nkambo. Kafwako nangwa kimo kyo Nakonsha kuuba ne, kechi kujipo kintu kyo Nakonsha kuuba ne. Talai! Aye watongwejile jimo amiwa, Aye wangichile, Aye wasalululwe. Amiwa kechi na musalulwile Aye ne. Aye

wasalulwile, Aye wakusalulwile, Aye witalulwile atweba bonse. Atweba kechi twamusalulwile Aye ne. Yesu waambile mba, “Anweba kechi mwasalulwile Amiwa ne, Yami ne musalulwile.” Aye waambile mba, “Kafwako muntu nangwa umo wakonsha kwiya kwi Amiwa ne kanatu Ba Taata bamukoka patanshi, kabiji ne bonse bobapa Bataata Amiwa bakeya kwi Amiwa. Kabiji kafwako nangwa umo walubilamo ne, kanatu mwaana walonaiko, mukufikizha—Kinembelo.” Anweba Mwikimona? Waambile mba, “Bino bonse bobapa Amiwa kwi Bataata bakeya kwi Amiwa.”

<sup>111</sup> Oo, Amiwa mbena kubanda bingi, Amiwa kechi byo nauba nenyi? Kabiji Amiwa kechi nafumamo mu kikye ne. Amiwa kechi natatulako pa kikye ne. Lekai mpelawizheko, Nafwainwa kufika pa kintu kimo ponkapo bukiji bukiji, kabiji tupelawizheko. Nafwainwa kubwela ku kwalulwabubaana pa mineti umotu. Oo, mundekeleko mambo pa—pa mineti umo? Twayai tufike pa kikye, bamo babo bantu bafuma kwalepa ku Georgia baji kuno pa bufukutu buno, mpeshai michima yabo. Pano, mulongo mwina Georgian, kabiji ne mwina Texas kabiji ne konse ko mwafumina, telekai ku yuwe veeleshi wabu 5. Twayai twikaleko pa kikye pa mamineti acheche.

*Aye witutongwejile jimo atweba kwikala—  
kwikala . . .*

<sup>112</sup> Nga kyambo kya “kwikala” kyalumbulula ka, kyambo kya “kwikala”? Kyalumbulula mba ke kintu kyo tubena kuyamo, kwikala. “Amiwa mbena kuya ku nsulo. Amiwa mbena kuya ku kipona.” Humes, wikyumvwa kyo nyi? “Amiwa mbena kuya ku desika.”

*Pano, Aye witutongwejile jimo amba kebalule ke  
baana moka mwi Yesu Kilishitu kwi aye mwine, monka  
Aye Mwine mo kyamutokela ku muchima,*

<sup>113</sup> Ing’anyi buwame? Bwajinga buwame bwa ng’anyi, buwame bwabanyi? Bwanji Ayemwine. Bwanji Ayemwine monka mo kyamutokela ku muchima Aye Mwine.

<sup>114</sup> Pano, kyo kika “kwalulwabubana”? Pano lekai ami ndete kikye, Amiwa kechi nayuka ne kana . . . Amiwa kechi sakwikala na kimye kya kupwisha kikye ne, bino Nsakufikapo. Nanchi inge paji jimpuzho, mwakosha kungimpuzha palutwe pacheche monka mu mbila, kintu kimo. Telekai. Kwalulwabubana kwenu kechi ko kusemwa kwenu ne. Kwalulwabubana ke kwikajikwa kwenu. Kimye kyo wasemenwe jibiji, Yoano 1:17, Naketekela, inge twasemekwa ku Mupashi wakwa Lesa, atweba twi baana bakwa Lesa. Bino atweba twatongwejilwe jimo. Pano kino kyo Mbena kukeba kuleta kwi anweba, mambo ababo baana ba mu juba jakupelako, mwikimonanyi, ku . . . Mwamona? Atweba twatongwejilwe jimo (kwikala) kwalulwabubana.



115 Pano, pano potuji. Bino, akye kyo kikozha ba Pentekosito pacheche. Baamba mba, “Amiwa nasemekelwe jibiji! Lutakaiko lwikale kwi Nkambo, njina Mupashi Wazhila!” Kyawama. Obewa wimwana wakwa Lesa. Abyo ibyo. Bino nangwa byonkabyo akyo kechi kyo Mbena kwambapo ne. Monai, obewa watongwejiilwe jimo kwalulwabubana. Kwalulwabubana, ke kwikajika mwaana.

116 Amiwa njibingi pepi na kikye, mambo Becky wambujile mba Mfwenya bingi pepi ku kikye, kechi mwakonsha kumvwa kunyuma ne. Amiwa . . .

117 Monai, mwaana. Baanga bayuka mizhilo ya kwalulwabubana mu Lulayang’ano Lwakala? Nangwa byonkabyo, anweba mwamona. Mwaana wasemekelwe. Naketekela nji nakyo mu mbila imo. Kyo kika kyo, Gene, wavuluka nyi? Kiji pa tepu. Oo, kyajinga kika? Na—Na—Na—Nafika pakyokyo. Oo, ee, Nafikapo, *Mumvwai Aye Iye*. *Mumvwai Aye Iye*; kwalulwa kwikala ke baana.

118 Bino, mu Lulayang’ano Lwakala, kimye awa—kimye awa mwaana po asemekelwe mu kisemi, aye wajinga mwanyike kimye kyo asemekelwe, mambo wasemekelwe ku basemi yanji, aye mwaana wa mukisemi kabiji swanyi wa bintu byonse. Pano, bino awe mwaana bamufunjishenga ku bafunjishi. Ngalatiya, kyapitala kyabu 5, veeleshi 17 kufika ku 25. Kijitu bulongo. Aye wafunjishiwe ku bafunjishi, basunga baana, bafunjishi. Pano, nobe kyakumwenako, inge Najinga na mwaana wasemwa, kwaamba mba, Amiwa ne shanji kabiji . . .

119 Kabiji ao oene mambo mu King James, baanga balangulukapo mba akye kyatama mutangilo mu King James Version, waambile mba, “Mu nzubo Ya Bataata muji mwakwikala mwavula”? Nzubo, muji mwakwikala mwavula. Mwamona? Kine, mu—mu moba Baibolo po atuntulwilwe wa King James, aya *nzubo* yajinga “mwakwikala.” “Mu Ba Taata muji *mwakwikala* ke manzubo avula.” Kechi mu nzubo ne, mwakwikala, bino Aye watelelewe mba Taata wa mumwe mwakwikala. Bajinga nakyo mwaila Baibolo, mu Baibolo abyoo kiji.

120 Inge bashanji bajinga na bujimi bukatampe bwa maekakiumbi kimo, nangwatu kintu kikwabo, aye wajinga na jibumba ja bantu bekala *konka*. Aye wajinga na bamingilo bakala *konka* na kulama mikoko, wajinga na bamo *kukwe* ba kulama bang’ombe, wajinga na bamo *kukwe* bayanga kwa kujila banyama kwalepa aduleendi mailoshi, kabiji aye wajinga na bamo *kukwe* bakulama bambuzhi, kabiji wajinga na bamo bakulama ba myule kabiji—kabiji ne bintutu byapusana. Aye—aye wajingatatu na bufumu bukatampe. Kabiji wakajilanga pa mbongolo wanji na kuzhokoloka konse konse na kumona

byo babena kuuba, baktutenda-booya ne bikwabotu muyewa musango. Aye kechi wajingapo na kimye. . .

<sup>121</sup> Anweba kuuba mwang'umvwa ne Amiwa inge nafumako kukwe. Ami—Ami—Ami nsakweseka kwikalako panyuma papo. Mwakonsha nkung'umvwa bulongo kino kimye, muno nyi? Talai.

<sup>122</sup> Aye waendanga, ne kuya kwalepa, na kweseka ku—kulama bwanji—bwanji—bwanji bufumu. Nanchi pano aye ubena kukeba. . . Awa mwaana usa kwikala swanyi wa pa byonse byo aji nabyo. Aye ke swanyi.

<sup>123</sup> Kabiji inge twasemekwa mu Bufumu bwa Lesa, monka mwi Yesu Kilishitu, atweba twi buswanyi bwa Mwuiulu, bakuswana pamo ne Yesu, mambo Aye wasendele kifulo kyetu. Aye waalukile ke atweba (bubi), pakuuba mba twikale ke Aye (bololoke). Mwamona? Aye walukile ke amiwa pakuuba mba Amiwa ngikale ke Aye, monai, bakuswana-pamo Nanji. Kijitu bulongo, pano vulukai kyokyo, ku umo umo wa mwi anweba.

<sup>124</sup> Pano, vulukai, Lesa waktongwejile jimo obewa, monka mukuyukila jimo, amba obewa ukeya ku Kikye. Anweba bonse mwikyumvwa, sutulaiko maboko enu, mwamona. Lesa, na kuyukila jimo kwanji, waktongwejile jimo kwiya ku Ntanda ya mulaye. Yoika Ntanda ya mulaye ya Mwinakilishitu leelo? Sutulaiko kuboko kwenu inge mwayuka. “Mulaye walailwa kwi anweba ne ku baana benu, ne booba baji kwalepa. Kabiji kikeya kufikizhiwa mu moba akupelako, byo byaamba Lesa, amba Amiwa ketulwila Mupashi Wami pa bantu bonse, baana benu babalume ne babakazhi.” Kabiji mu Isaya 28:18, “Mukambizho pa mukambizho, ndonda pa ndonda; apo pacheche, apa pacheche. Kwachijijilai ku kyokya kyawama. Mambo na kikukuma ne na jimi ingi Amiwa kesamba na baabo bantu. Kabiji akwe ko Kukokoloka, akwe—akwe Kukokoloka, yo ntanda ya sabando yo Naambile mba mukatwelamo. Kabiji, pa byonse bye, kechi bakonsha kumvwa ne, bino bapukumwine mitwe yabo ne kufumako, kabiji kechi bakonsha kwi Kyumvwa ne.” Mwamona? Byokiji.

<sup>125</sup> Kyajinga kika? Kijitu pamo nobe boba bantu bafumine mu Kenana, nangwa kufuma mu Ijipita, kupita monse mwa mu kiselebwa, kabiji bafikile ne kwipi, pepi bingi kyakuuba mba bakonsha kutopa ne magelepu abena kufuma muyoya ntanda. Mulongo, konkakwa, aabo bantu babena kukeba amiwa mbwele ku kyokyo, pa Bahebelu 6. Nga Nakonsha kwikyuba byepi? Abo baitabula bapelelatu kumupaka, abo kechi bakabuka ne! Kechi bakonsha kwabuka ne. Yesu waambile mba, “Betu. . .”

Baambile mba, “Bashakulu betu bajilenga manna mungyetu.”

<sup>126</sup> Kabiji Yesu waambile mba, “Abo, bonsetu, bafwa.” Aba baabenamo. Abo, bonsetu, bafwa. Abyo ibyo. Waambile mba,

“Bino Amiwa ne Shinkwa wa Bumi bwafuma kwi Lesa kufuma Mwiulu. Awa muntu uja awe Shinkwa, aye kechi ukafwa ne. Abyo ibyo. Ee, mwane, aye uji na Bumi Bwapeenape inge aye waja Kikye, Amiwa ne kyokya Kinchi kya Bumi kya kufuma ku bujimi bwa Edena.”

<sup>127</sup> Pano, monai, abo bantu baishile pepi bingi! Monai, inge mwamona mu Bahebelu 6, kechi kubwela ku kyokyo ne, pakuuba mu Bahebelu 6, “Abo bantu kimye kimo baalwilwe ke ba kutambulako lubaji, bayishile bingi pepi, kabiji batopa ne kya bupe kya Mwiulu.” Baikajile bazhokoloka, bamwene lubuko lwaubiwe, bamwene bantu kasa baji mu bulume bwa Lesa, bamwene bumi wwapipulwa, bino kechi bakabikapo kuboko pe Akyo ne. Ine, mwane. Ine, mwane. “Kabiji batompele pa bulume bwa ntanda ikeya; kabiji kechi kyakonsheka kwibabusha jibiji ku lulapilo ne, byo kyamweka mba abo—mba abo bene bepopela jibiji Mwaana wa Lesa ku musalabo, kabiji ne kusula Mashi alulayang’ano amo mo bazhijikilwemo . . .”

<sup>128</sup> “Amiwa ne wa ku kipwilo kyo baketekela mu kutokeshiwa.” Akyo kikalatu kyawama inge kyaikala kibena kuya kulutwe, bino kechi kiya palepa bulongo ne. Mwamona? Ee, mwane. Kiselebwa kibazhijikile. Ee, kyakine. Abo bajinga na muloolo walubemba kabiji ne—ne kyakusokelapo bitapisho kya lubemba, kabiji bintu byonse kokwa, kutokeshiwa, bino batwelele mu Palasitani na kukokoloka. Kechi ba . . .

<sup>129</sup> Talai mu Bahebelu 4, kechi waambapo “kukwabo Kukokoloka nenyi”? Lesa walengele juba ja butanu na bubiji kabiji wibapele kukokoloka pa juba ja butanu na bubiji. Pantu pakwabo po aamba na juba ja kukokoloka, “kabiji leelo mwi Davida.” Nanchi Aye wibapele ku Kokoloka kukwabo, “Iyai kwi Amiwa anweba bonse mwasulwila na mingilo ne kunemenwa, ne Amiwa nkemukokolosha.” Twelai mu kukwe Kukokoloka! Mambo atweba twatwela mumwe mwa Kukokolokela twa kokoloka ku mingilo yetu nobe byonka byaubile Lesa ku Yanji pa sabando. Kyakine. Ako ko Kukokoloka kwenu kwa Sabado. Ako ko kwine Kukokoloka mu iye Ntanda ya mulaye.

<sup>130</sup> Aye Mupashi Wazhila ye mulaye wa bantu. Kabiji kika kyakukebela basapwishi bafunda masukuulu be balekela mba bamvwalenga tuputula ne kutenda suki yabo, kabiji ne kushinga mivumbo yabo, ne bantu bakaya ngyuka ne kutoma malwa ne kwamba bisela, kabiji ne kuyatu na kutwajijila muyewa musango, kabiji ne kwiyita abo bene mba bamembala ba kipwilo? Kika, bakonsha kutola kintu kyayewa musango ne kukana butangi bwa Mupashi Wazhila! Kika, Baibolo waamba mba Kyambo kya Lesa kya kwa kukila mpoko yatwa-kubiji ayo ichibaula kufika ne ku kwabanya kwa bikupa, kabiji ye upimapima milanguluko ya muchima. Ee, yo milanguluko ya muchima!

<sup>131</sup> Kabiji inge twatemwa ntanda nangwa bintu bya muntanda, butemwe bwa Lesa kechi buji ne mwi atweba ne. “Bavula baitwa, pakuuba basalululwa bo bacheche; mambo kibelo kyakepa ne jishinda jicheche biya ku Bumi, kabiji bejimana bo bacheche. Bavula bakeya kwi Amiwa mu joja juba kabiji bakekala mu Bufumu,” byo byaambile Yesu, “ne Abulahama, Izaka ne Yakoba. Pakuuba baana ba bufumu bakapangiwamo, ne kwaamba mba, ‘Nkambo, bushe kechi twauba *kikye* mu Jizhina Jenu nenyi? Bushe kechi twasapwijienga nenyi? Bushe kechi twajinga ba Dokotala *Kananga-ne-kananga* kabiji ne Levaladi *Kananga-ne-kananga*?’ ‘Amiwa kechi ne muyukilepo ne. Mfumai kwi Amiwa, anweba banguba bibi, Amiwa kechi ne muyukilepo ne.’ Kechi bonse baamba mba, ‘Nkambo, Nkambo,’ bakatwelamo ne. Bino awa uba kyaswa Muchima wa Ba Taata baji Mwiulu, awa ye yenka ukatwela.”

<sup>132</sup> Abyo byo kiji, kutwela mumwe mu Ntanda ya mulaye. Tutwelamo byepi? Twatongwelwamo jimo. Akyo Kipwilo, monka mu kuyukila jimo kwa Lesa, watongwelwa jimo (kuka?) ku munema Wanji, monka mu bupe Bwanji, konka kulukumo, ne bupopweshi kabiji ne kulukumo lwa Lesa. Papa, kasa aikala byo bya ku ntendekelo, waikalako-pabuke bwanji, kafwako nangwa kimo kyajinga kulubaji Lwanji ne, wakebelenga kintu kimo kya kumupopwela, nanchi Aye wayukijile jimo kabiji ne kutongwela jimo Kipwilo, kintendekesho kya inontanda kasa kikyangye kwikalako, kabiji ne kubika mazhina abo mu Buuku wa Bumi wa Mwanamukoko, kimye aye... waipailwe kintendekesho kya inontanda kasa kikyangye kulengwa, pakuuba mba bakamweke ku lukummo Lwanji kabiji ne kulutotelo Lwanji ku mpelo ya kimye, kimye kya kwi bikokakenya bintu byonse mu Muntu umo, Kilishitu Yesu. Yii! Lukumo! Byokiji. Abyo ibyo . . . Kabiji abyo byokiji, mulongo wami, nyenga. Kechi wakonsha kwenda kufuma ku Kyokyo ne.

<sup>133</sup> Lesa, monka mu bupe Bwanji bwa kusalulula, wakwichile obewa. Lesa, monka mu bupe Bwanji bwa kusalulula, wakutokeshe obewa. Lesa, konka ku lusa Lwanji lwa kusalulula ne bulume Bwanji, wa kubatizhe mu ino ntanda ya Kukokoloka. Abo batwela mu kukwe Kukokoloka bakokoloka kuya mu mashinda angi. Bakokoloka ku mingilo yabo byonka Lesa byo aubile ku Yanji. Baji na lusekelo lwakubula kulondolola, kabiji lwayula lukumo! Akyo Kichi kya Bumi kibena kutepuka mwi abo. Baji na kukoka muchima, banekena, buwame, butekanye bwalenga lwitabilo, lwitabilo, bukimote, kunekenena, ne bikwabotu. Akyo Kichi kya Bumi kibena kutepuka mwi abo mambo luketekelo lwabo lwa imikwa mwi Kilishitu Yesu, bukamonyi bwa Mupashi Wazhila bubena kushimuna na biyukilo ne na byakukumya kasa bibalondela baitabila. “Abye biyukilo bikebalondelanga baitabila.” Byo bayilenga, babukilenga bakolwa, bapangilenga bademona, baambilenga

mu jimi, bamwenenga bimwesho. Abo . . . Kabiji benda na Lesa, bamba na Lesa. Kafwako diabola wakonsha kwibasukenya ne, baikala bashikamana, na kukeba . . . ? . . . Bamvulama bintu byapita kunyuma, kasa bebikakotu kunanga kikonkwanyi kya mpesela ya lwito lwa mwiulu lwa mwi Kilishitu Yesu. Abyo byobaji. Abyo byobaji. Akyo kyo Kipwilo.

<sup>134</sup> Bafikileko byepi? Anweba kuuba mwaamba mba, “Kyawama, Nkambo, Mwayukatu, juba jimo Natatwile kumpepa fwaka, kabiji Naponene, nanchi Nalangulukile mba Na . . .” Oo, ine, ine, ine, ine.

<sup>135</sup> Kutongwelwa jimo! Aye witwichile, kabiji byo twamulondejile Aye twaamba mba, “Lesa, twajinga balubilamo kabiji babulwa kintu nangwa kimo ne. Atweba kechi twajinga na milanguluko ya kwipulusha atweba bene ne. Twajinga mu kitemwa kya ngulu, kya kutatwilapotu atweba twajinga bangulu.”

<sup>136</sup> Anweba inge mwaya ku kipaka kya bangulu kabiji mwatala ngulu mukatampe, ne kwamba mba, “Pano, tala kuno, mwine wakala, Nasaka kukubulapo kintu kimo. Ke kintu kyatama obewa kutoma byapanshi.”

<sup>137</sup> Aye wakonsha kwamba mba, “Oink-oink.” Mwamona? Pano, akyo kijitu pamo nobe kwi pulusha obewa mwine. Abyo kine ibyo.

<sup>138</sup> Mwaamba mba, “Inetu, kechi wakonsha kumvwala bya kuvwala biji byo byo ne, wafwainwa kumvwala bulongo. Obewa wafwainwa kuba *kikye*. Anweba kechi mwafwainwa kuya ku . . . Anweba kechi mwafwainwa kwikala na bibye bijilo ne. Anweba kechi mwafwainwa kupepa fwaka ne. Anweba kechi mwafwainwa kuuba *kikye ne*. Anweba, anweba kechi mwafwainwa kusenda *kyokyo ne*.”

<sup>139</sup> Aye waamba mba, “Oink-oink. Amiwa ntanwa ku ba *Oink-oink*.” Uu-uu. “Oink,” akyo kijitu pamo nobe monka mo bayukila. “Kyawama, Amiwa kemuyukisha Njitu pamo kuwama byonka byo muji. Oink-oink!” Monai, abo bakana butangi bwa Mupashi Wazhila, mambo Baibolo waamba mba inge obewa watemwa ntanda nangwa bintu bya muntanda, butemwe bwakwa Lesa kechi buji mwi obewa ne.

<sup>140</sup> Kika kibalengela kwikala bapusanako? Anweba mwi kyaalo kyazhila. Anweba kika kyo mwauba? Wafumamo muyoya ntanda. Anweba muji mu Ntanda ikwabo. Anweba mwakafikilemo byepi momwa? Aya yo Ntanda ya mulaye. Ing’anyi musango wa mulaye? “Kikeya kufikizhiwa mu moba apelako, byo byaamba Lesa, Amiwa nketulwila Mupashi Wami pa bantu bonse.” Konka ku Mupashi umo atweba bonse mo twabatizhiwa mu iye Ntanda ya mulaye. Amena. Balongo ne banyenga, aleluya, na muchima watokato, kafwako mukao ne, kafwako bulwany ne, nangwa kimotu ne! Amiwa kechi

nasakamana ne nangwa mulongo wafuma mujishinda, nangwatu wauba kyamusango ka, ukamulondelela.

<sup>141</sup> Amiwa nalondejile mulongo kechi papita moba avula ne, aye wafumine mujishinda. Mulunda umo mwanyike waambile kwi amiwa, mba, “Mulekaitu yewa mujimbijimbi. Mulekaitu bunke bwanji.”

<sup>142</sup> Naambile mba, “Inge Nakonsha kufika pantu pamo pakuuba mba muchima wami kechi nakonsha kwendela pamo na mulongo wami ne, nanchi ke kimye kyami kya kuya ku kitapisho, mambo Napona kufuma ku lusa.” Naambile mba, “Amiwa kaya kikulutu ubena kupema mu mubiji wanji, kabiji Nakonsha kumutana pantu pamo monka mulwendo.” Ee, mwane. Kabiji umvwe Namukwata, alaluya, na mu bwezha. Ee, mwane. Aye wabwela mu jitanga mu mutende. Ee, mwane. Aye wayile mujishinda jingi jiji nobe ntanda.

<sup>143</sup> Kimye kicheche kyapita byo Najikumona awa kamulanda mwanamukazhi kasa aikala popa, kabiji balama mutende bangichile, amba, “Kika, aye wafwainwa kumvwala mu jekete.” Waambile mba, “Awa kileya, milanguluko yanji ya lubakana.” Aye—aye, bamubikile mu otela. Abo baishile.

Naambile mba, “Abyo ibyo.”

<sup>144</sup> Waambile mba, ulama mutemde waambile mba, “Kika, Billy!” Amiwa namuyuka bingi bulongo, kabiji na muyukile kufumatu ku bwanyike. Aye waambile mba, “Inge pajipo kintu kimo kyo Nakonsha kuuba pakuuba mba ne mukwashe.”

Naambile mba, “Abyo ibyo.”

Waambile mba, “Mwakonsha ku mukwasha nyi?”

Naambile mba, “Ine, bino *Aye* wakonsha.” Naambile mba, “Paka minetitu kamo.”

<sup>145</sup> Nanchi ba muletele kokwa. Kabiji byo afumineko kimye kicheche kyapitapo, wajinga na mutende. Kyajinga kika? Twatumine mulombelo wanji. Amena! Aye wajinga bingi. . .

<sup>146</sup> Baambile mba, “Ubena kukeba kwikala dokotala nyi?” Waambile ku mulume wanji mba, “Ubena kukeba dokotala nyi?”

<sup>147</sup> Waambile mba, “Dokotala kafwako kyo akonsha ku mubila ne.” Kabiji abyoy ibyo. Aye wakonya; dokotala kafwako nangwa kimo kyo akonsha kumubila ne.

Waambile mba, “Luketekelo lwetu ke kufika *kokwa*.”

Kabiji aye waambile mba, “Billy, Amiwa kechi nakwatakanya kyokyo ne.”

Naambile mba, “Amiwa kechi naketekela obewa kuuba,” mwamona, “kechi naketekela obewa kuuba ne.”

<sup>148</sup> Bino, oo, ami, nangwatu Amiwa kechi nekiyuka ne! Ine. Bino, mulongo, Lesa Mwiulu. . . Najinga kwalepa, kimye kimo

kokwa, Kintu kimo kyaishile panyuma yami. Amena! Kechi kyajinga mambo akuuba mba Nakebelenga kwiiya, bino, ine, Kintu kimo kyaishile panyuma yami. Mambo kitendekesho kya ino ntanda sakikyaangye kwikalako, Lesa watongwejile jimo, aleluya, amba tukekala Banji, ku munema ne lukumo Lwanji. Telekai! Aba Aye bo ayukijile jimo, Wauba ka? Wibeta. Abyo ibyo? Bushe Aye wakwichile? Ee! Kika Aye kyo akwichijile? Aye wakuyukijile jimo. Aba bo Ayukijile jimo, ibo bo Aita; abo bo Aita, bo Abingisha. Abyo ibyo nyi? Kabiji aba Aye bo abingisha, Aye wibatumbijika! Amena! Abyo Baibolo byoabyo aamba: “Aba bo Ayukijile jimo, ibo bo Aita.” Kila kisemi! Aba Aye bo ayukijile jimo, Aye wibatumbijika kala. Kika? Lekai tange Kinembelo papo. Kijitu bulongo.

*Monka mo ebatonwgewejile jimo abo amba kebalulebubaana monka mwi Yesu Kilishitu kwi aye mwine, monka Aye Mwine mo kyamutokela ku muchima . . .*

*Ku lutotelo lwa Lwanji lukumo . . .*

<sup>149</sup> Oo, mwikyumva nyi? Ku lutotelo lwa lukumo Lwanji! Amba Aye wabikilemo mu mankulo a Peenape akatwajijila kuya kulutwe, kabiji baana Banji bakonsha kubijika mba, “Abba, Taata! Abba, Taata!”

<sup>150</sup> Kabiji ba Malaika baamba mba, “Kika kyo babena kwambapo? Kika kyo babena kwambapo?”

<sup>151</sup> Nanchi kyaubilwe bingi bulongo mu mwaana walubile. “Amiwa najinga wa lubilamo.” “Awe ke mwaana wami. Aye wajinga wa lubilamo kabiji pano wamweka. Aye wafwile, kabiji aye uji na bumi jibiji. Kaletai mwana ng’ombe wanuna, ne mukangyo wawama, ne kambala munwe babike ku munwe wanji. Kabiji twayai. . .” Kechi kyakukumya ne kimye bantaanda ba kumakya byo baimbile pamo, baana bakwa Lesa babijikile na lusekelo, byo bamwene mutanchi wa lupulukilo, Lesa wabika jizhina jobe mu Buuku kintendekesho kya ino ntanda kasa kikyangye kwaalwa.

<sup>152</sup> Pano anweba mwamba mba, “Calvin waketekejile kintu kimo kya yeo musango.” Amiwa kechi naketekejile Calvin ne. Calvin wajinga wipayang’ana. Calvin waipaile muntu mambotu wabatizhe mwi Yesu mu Jizhina. Aye wajinga muntu mujimbijimbi, wakebelwenga kwalululwa, aye mwine. Ee, mwane. Pakuuba byo aambile, pa bintu bimo byo aambile, byajingatu bulongo. Kechi. . . bino aye byo. . . Byanji byubilo, muntu wipaya muntu pa kintu kya musango yewa, akyo kyatama, ke bundengamambo. Kijitu bulongo.

*Abo aye bo etuvuzhizhe atweba na . . .*

<sup>153</sup> Oo, pembelelai, Amiwa kechi nakufika ne pa “kwalulwabubana,” Ami nakufika? Amiwa Nakila pa kimye? Twayai tumone bibena kwamba iye koloko, kimye ka kyo

twafikapo. Kijitu bulongo. Pano—pano twayaitu tusendeko mamineti jikumi na mambotu aboba bantu bafuma kwalepa. Talai. Talai.

<sup>154</sup> “Kwalulwabubana,” lekai ne mumweshe byo kyubiwa. Taata uji na bufumu bwabaya, aye uzholoka konse. Pano aye uji na mwaana wasemwa. Oo, aye waikala bingi nalusekelo! (Awa ke Lesa.) Nanchi mwayuka byuba bataata nyi? Aye ukeba bakomesha bawamisha, bafunjishi. Anweba mwayuka mufunjishi byo aji, kechi mwayuka nenyi? Ke mufunjishi wa sukuulu. Aye ukeba yenka wawamisha mufunjishi wa sukuulu ye akonsha kutana mu kyaalo kyonse. (Kabiji pano tubena kuya, telekai.) Kabiji aye utana mufunjishi wasukuulu wawamisha ye akonsha kutana. Aye kechi usendatu wabula kufwainwa ne, aye ukeba nsongwalume wanji kwikala mulunda wafikilamo.

<sup>155</sup> Kechi mukeba baana benu kwikala muyewa musango nenyi? Kine, byawamatu byo mwakonsha kwibapa! E, mwane. Nanchi inge muntu wakumbiji walanguluka kyokyo, mwalangulukapo byepi Lesa byo alanguluka pa baana Banji? Bonka bawamisha Aye bo akonsha kutana.

<sup>156</sup> Nanchi, aye ukeba muntu ukekala wakishika. Pano, aye kechi mwanamulume. . .ukeba muntu kwamba mba, “Pano, talai, Na—Na. . .Junya, obewa ubatu kintu kyonse kyo ukeba, mutemwe.” “Oo, ee, taata, uu-uu, ubena kutwajijilatu bulongo, aye ke nsongwalume wawama.” Watambula kalupi kacheche panyuma yanji ne ngozhi mu kisochi kyanji. Ine, ine. Awa muntu bakonsha kumupanga ponkapotu. Kine. Aye ukeba muntu wakonsha kwikala wabukishika. Inge awa nsongwalume ubena kukoma bulongo, wamubula. Inge ne, wamubula kintu kyatamako.

<sup>157</sup> Kabiji inge taata wa patanda walanguluka kyokyo. . . Anweba kechi mwakonsha kukeba muntu wakishika kwi anweba, mufunjishi wa sukuulu waikala wakishika pa baana benu? Kine. Kyawama, anweba mulanguluka mbaka pa bilanguluka Lesa? Kabiji Aye wayuka; atweba kechi tuuba ne, Aye wikyuba. Atweba twi pelelelatu, atweba kechi twakonsha kubulang’ana ne. Bino Aye kechi uji na mpelo ne kabiji wayuka.

<sup>158</sup> Nanchi, mwayuka byaubile Bataata nyi? Aye kechi waambilepo mba, “Amiwa katola papa atalenga pa baana Bami ne.” Nangwa Aye kechi waambile mba, “Amiwa nsakwikala na—na bishopu ne.” Ine, ine. Aye kechi waubile kyokyo ne, mambo Aye wayukile mba papa wakonsha kuya mungi, nanchi ne bishopu pamo. Mwamona? Aye kechi waambile mba, “Amiwa mbena kusenda genulo ovasiya amba amonenga kipwilo Kyami ne.” Ine, ine.

<sup>159</sup> Aye watolele Mupashi Wazhila. Awa ye wajinga Mufunjishi Wanji, uu-uu, kukomesha baana Banji. Kijitu bulongo. Pano mwakonsha kuyuka byepi amba Mupashi Wazhila



wibiyuka? Aye waamba kupichila ku mivumbo ya muntu. Anweba mwakonsha kuyuka byepi amba Aye ubena kwamba Bukine? Inge mwamona Mupashi Wazhila waamba kupichila mu mivumbo yamba bya Bukine kimye kyonse, waambila jimo kabiji kyaiya kyafikizhiwatu bulongo, nobe byonka byaambile Samwela, nanchi mwayuka mba abo Bukine. Kibena kufikizhiwatu bulongo. Mambo Lesa waambile mba, “Inge waamba kabiji byo aamba byabula kufikizhiwa, kechi mukamuvwe ne, mambo Amiwa kechi nji nanji ne. Pakuuba inge kyaubiwa, kyawama, popo mukamuvwa, mambo Amiwa njinaji.” Mwamona? Abyo byokiji. Abyo Aye byo oba.

<sup>160</sup> Pano, nanchi Aye uzhokoloka. Pano, mwalanguka byepi awa Mufunjishi byo akonsha kwamba inge Aye waya kwi Bashanji? Kabiji ne kwamba mba, “Benu—Benu baana ngubilo yabo yatama. Amiwa mbena kwi mubuula Anweba, awa nsongwalume Wenu, aye, hum, aye wayatu mungi. Aye wingila bingi, Amiwa kechi na kimonapo muntu uji byobya ne! Ami, Anweba mwayuka byo oba? Kabiji ne yewa nsongwakazhi Wenu! Oo, woo, Amiwa kechi nayuka Anweba kyo mukoba nanji ne. Hmm. Kyawama, Anweba mwayuka kinekitu nyi? Aye umwekatu nobe. . . Aye wipetatu yense nobe bakwabo bansongwakazhi bajiko. Benafilisitaya. Ee, Mwane, aye ukeba kuuba byonka byo boba.”

“Mwaanami wamukazhi?”

<sup>161</sup> “Ee, Mwanenu wamukazhi.” Abyo Mupashi Wazhila byo akonsha kwamba pa kipwilo leelo. Oene mambo kechi twakonsha kwikala nakusangululwa ne. Mwamona? Pano, akyo kyakine.

“Pano nga mwaana Wenu? Uuu? Kintutu kimo.”

“Kika?”

<sup>162</sup> “Kyawama, Anweba mwayuka kimye kyonse Mwaambilenga mba aya mikoko yafwainwa kutangijilwa kuya ku munyevu uji kokwa aka Kajo kamikoko kaji kokwa. Ee, Anweba mwayuka byo aubile nyi? Aye wibatwajile kokwa ku mulumba wa matete. Aye wibatwajiletu kokwa ne kwibasha kokwa ku kakola, kabiji ne kwibaleka baikala konkakwa ku mulumba wa matete, na kuja bipupu, kabiji abo bakamulanda kechi bakonsha kufumamo momwa ne.” Aba ba mabishopu, bakafunga bakana Bulume bwao. “Kyawama, Amiwa nemubula bukine, Amiwa kechi nakimonapo jibumba ja mikoko jiji na lubazhibazhi mu bumi Bwami ne.” Aye kechi watemwa kyokyo ne. Ine. “Kabiji Anweba mwayuka kine kintu nyi? Aba bang’ombe kokwa, Anweba mwayuka Anweba—Anweba mwibabujile mba baje byobya—byobya bisono byakujima, Anweba mwayuka, mwakwibabaisha nyi?”

“Ee.”

“Anweba mwayuka byo abena kupana kwi abo?”

“Ine.”

163 “Aya seku yakala. Ee. Aye ubena kwibalengela kutwela mu tubungwe ne byonsetu. Obewa kechi wa kimona bya yewa musango mu bumi Bobe ne. Obewa kechi wa kimonapo bya byobyoy mu bumi Bobe ne. Anweba mwayuka byo abena kuuba? Ubena kuya na kupepa kifwaka kikatampe, kunyuma yanji. Aye uji na mukazhi wanji, wamvwala tuputula nobe byonka bibena kuubapo bena Filisitiya. Ee.” Ao ye musango wa mbila Mupashi Wazhila yo afwainwa kwambapo pa kipwilo leelo. Pano, mwalanguluka byepi pa kyokyo?

164 Akwa ke kwalulwabubana. Kika Aye...bushe Aye wikyubile? Aye witutongwejile jimo atweba—atweba ku kwalulwabubana. Aye witupele Mupashi Wazhila; bino, pembelelaiko mineti umo, kwalulwabubana, akyo kyo tubema kwambapo. Kwalulwabubana!

165 “Kyawama, Anweba mwayukatu byo oba? Ba bishopu baishile juba jikwabo, kabiji babulang’ene. Aye wajinga na mpwijilo ya lubuko kokwa, kabiji ba bishopu baishile. Muntu umo, mulongo, waishile kabiji walombejilenga bakolwa. Kabiji aye waambile mba, ‘Obewa uleke kyokyo!’

“Oo, oo, ee, taata bishopu, Amiwa kooba kyokyo.’

“Kechi wakonsha kwikala na lumvwang’ano ne.’

“Oo, ine, ine, taata bishopu, kine kechi ibyo ne.’

166 “Kabiji Amiwa naiya na kumubula Bukine buji monka mu Kyambo Kyenu. Monai, Kiji bino. Amiwa namutangila mizhilo Yenu byafwainwa kubiwa, kabiji kechi wakonsha kuteleka kwi abo ne. Aye waambile mba, ‘Oo, akyo kyajinga kya mu nkulo ikwabo. Akyo kechi kibena kutongola amiwa ne.’” Abyo byokiji. Amba, pano akyo bo Bukine, mulunda. Pano kechi mwamona kipwilo po kyapusa kwikajikwa kwakyo, kika kyo twabujila kwikala na kusangululwa, kika kyo twabujila kwikala na bintu bibena kubiwa? Apo ipo po kyaikela.

167 Yoshiwa waamba mba, “Gadi, Nakeba obewa kuuba... ponka pano po paji kifulo kyobe mwayila byanembwa, kifulo kyobe kiji pano, ponka pano. Obewa twela muno, Gadi, kabiji ikala pano. Benamina, obewa yanga popa. Kabiji pano anweba bonse mukafumeko ku mupaka wabena Filisitiya.” Kabiji Yoshiwa wabwelele, apo abo baji monse monse mu Filisitiya, baji na kijilo kyakala, kasa babena kuzha byobyaya, kabiji ne banabakazhi bonse kasa bapeta, kabiji kasa babena kuzha kabiji baji na kimye kyawama. Kabiji Yoshiwa wakwanyinye ku mutwe waji, ne kwamba mba, “Pano kika?” Pano abyo byo bibena kumweka; kechi bonse ne, nasachila Lesa, kechi bonse ne, bino bavujisha. Kijitu bulongo.

168 Pano kika kyamwekele? Akyo kyo kyamwekele. Bushe kechi mulanguluka mba awa Muntu, Mupashi Wazhila, wamba

kwi Bataata inge Aye ke akebe kwamba kyokyo? Oo, ami! “Na—Na—Namubuujile, bino aye—aye—aye kechi wakonsha kwi Kiteleka ne. Amiwa na mubujile kyokyo, kabiji ne kumuleka watanga monka mu Buuku. Amiwa najinga—Amiwa najinga na wamwingilo muचेचे waishile na kumumweshwa mba Yesu Kilishitu ujitu pamo keesha, leelo, ne myaka yonse. Kabiji Mwayuka kine kintu nyi? Aye walekele umo wa mwiabo—walekele umo wa mwiabo ufunga-bambuzhi wayiya ne kumubula mba akyo kyajinga kya mu nkulo ikwabo. Mwamona? Kabiji aye waumvwine bwema bwatama bingi konka kwa, na bwema bwa bambuzhi, Anweba mwayuka, fwaka, kabiji Anweba mwayuka, kabiji ne bikwabotu, bya nukile bingi byo afikile kokwa. Mwamona? Bino Amiwa ne mubula Anweba, namba awa ufunga-bambuzhi wapelwe medulu yavula, mambo, Amiwa ne mubula Anweba, inge Anweba mwakonsha kunemba jizhina janji pa kipepala, kyakonsha kusenda (sawakya walufu lwanji) wakonsha kusenda kipepala afu na kutongola bifulo byanji. Ee, Mwane, abo kine bamutemwa ku kyokya kyaalo, bino, Amiwa ne mubula Anweba, amba aye kine kechi wayuka mwakujishisha mikoko ne. Akyo kyo kintu kimo pa kikye. Aye kechi ukateleka kwi Amiwa ne,” byo byaamba Mupashi Wazhila. “Naesekele ku mubula aye mba Anweba mwi umotu keesha, leelo, ne myaka yonse, bino aye—aye kechi wakonsha kwikyuba ne. Aye wayinga muntu wakila bingi moyo ye Namonapo mu bumi Bwami. Ee. Kabiji kipwilo kyamulenga kwikala mukulumpe, bishopu, ne bikwabotu, bantu bonse babena kuteleka kwi aye. Kabiji pano Anweba mwayuka kine kintu nyi? Basenda byobya. . .baji na kakitu kakala kobatela mba ‘televizhoni.’ Obewa waambula kintu kyakala pa *byobya*, kabiji—kabiji aba banabakazhi baiya kabiji ne kutwajijila kulutwe, ne misango yonse ya mandeleshi epi. Kabiji, Anweba mwayuka, baana Benu babakazhi bavula baji na- . . .”

“Oo, kine kechi ibyo ne!” Mwamona?

<sup>169</sup> Amba, “Ee, byo babena kwikyuba. Ee, babena kwikyuba. Hum. Bamo ba mwi abo babena kujila kukabila kusangululwa, Taata, bamo bamwiabo bekikeba bingi. Bamo babena kwendatu mu mulaini, bamo ba mwiabo baimanatu na bukine pa kyokya Kyambo byonka byo bakonsha kwikala. Bakwabo, Amiwa kechi nayuka kyakuuba ne, banji—banjitu kungi kokwa. Anweba mwayuka aba bakwabo kyo babena kuuba? Babena kwibaseka, kwamba mba, ‘Ke jibumbatu ja balubakana.’”

“Kyawama, akyo kindengela Amiwa kumvwa bingi bubu.”

<sup>170</sup> Pano twayai tukungye kipikichala. Pano aye Taata, mwaana Wanji ke nsongwalume wawama. Abo Bashanji baji—bajitu bulongo, uno ye Mufunjishi, aye Mupashi Wazhila. Jepi jishinda ja Mupashi Wazhila, Aye waambile mba, “Amiwa nsakwenda,” aye Mufunjishi waambile mba, “Amiwa. . .”

171 Mwaana waambile mba, “Amiwa nsakwenda bulongo ne Anweba. Nsakuya bulongo ne Anweba.”

“Oo, katumbatumba kalepa bingi, mwaana.”

172 “Amiwa nsakuya ne Anweba. Amiwa nji na luketekelo mwi Anweba. Inge Natatula kumvwa kukooka, Aye ukasutula kuboko kwami peulu ne kukwachijila.”

“Bino kuji ba bonkwe pa katumba kokwa!”

173 “Kechi kiji na kintu ne kikulutu Anweba pomuji, kechi kijipo na lupusano ne. Amiwa mbena kwenda kuya Nenu.”

“Kuji lukatazho kokwa, kuji mabwe atezhima.”

174 “Amiwa kechi nasakamana ne, kikulutu Anweba mwalama kuboko kwami, Amiwa nkenda kuya ne Anweba. Amiwa nkenda kuya ne Anweba.”

“Oo, mwayuka kine kintu nyi? Ba Shobe baubanga kyokyo, mwamona. Akyo kyawama. Ee, mwane.”

175 Kajila peulu ya katumba popa. “Oo,” Aye waambile mba, “Mwayuka kine kintu nyi, Taata? Wenu mwaana ujitu pamo nobe kipivwa kyafuma ku mututwa wakala. Aye bo bukine, ujitu pamo nobe Anweba. Kyonse Kyambo kyo mwamba Anweba, aye waamba mba ‘amena’ kwi Akyo. Amiwa—Amiwa najinga nanji kasa azhikula mu Baibolo juba jikwabo, kabiji Paambiwa mba, ‘Yesu Kilishitu ye umotu keesha, leelo, ne myaka yonse.’ Mwayuka kyo aambile nyi? Aye wabijikile ne kutaya maboko anji mwiulu, ne kwamba mba, ‘Aleluya! Amena!’ Oo! Kabiji Anweba mwayuka Kyaamba papo, mu—mu Kyambo Kyenu, Anweba mwayuka, apo Anweba po mwaambile mba, ‘Mingilo, aye waitabila mwi Amiwa, mingilo Yonguba ne anweba mukeyuba?’”

176 “Ee, Navuluka kunemba Kyokyo ku mwaana Wami. Ee, Navuluka kunemba Kyokyo.”

177 “Oo, aye byo amwene kyokyo, wabijikiletu ne kutolokela peulu ne panshi, ne kuuba kyongo, ‘Aleluya, Nkambo. Fumyaimo ntanda yonse mwi amiwa. Ndengai ami yeo Musango!’ Ee, Mwane. Kabiji byonse byo byo bintu byo aubile!”

178 “Oo,” ba Taata baambile mba, “Amiwa—Amiwa nji na lusekelo payewa mwaana. Awa ke mwaana wawama. Kijitu bulongo. Anweba ngimutalainga pa myaka icheche, mumone byo—byo abena kukoma, kabiji ne byo abena kuya palutwe.” Pakupitapo kimye kicheche myaka yapichile. “Ubena kwingila byepi?”

179 “Oo, ami, aye ubena kukoma ne mu bupe! Oo, ami! Aye ujitu... Aye ubena kusoka ne masaka. Amiwa mbena kwi mubula Anweba, aye—aye uji... Kika, aye utwala mikoko, wakonsha kwibalamatu nobe—nobe Anweba byonka byo muuba. Aye kechi wakonsha kwibapa nsono ya mumeema ne. Aye kechi

wibapa bipupu ne. Inge baiya kwipi, amba, 'Atweba tubena kukeba kwinunga ku kipwilo,' wamba mba, 'Zhika pa kanwa kobe, obewa kechi ukebewa kyokyo ne! Ine, mwane. Kino kyo ubena kukeba, "Lapilai ne kubatizhiwa, anweba bonse, mu Jizhina ja Yesu Kilishitu, mululekelo lwa mambo enu. Mukatambula wa bupetu Mupashi Wazhila.'" Ee, Mwane, abyobyoby aambile."

"Oo, kine wamba kyokyo nyi?"

"Ee, Mwane, kine uba."

"Kyawama, amo imo Amiwa mo Nekinembejile."

"Amo imo aye mo Ekyambila."

"Hmm!" Ee, mwane.

<sup>180</sup> "Bamo bamwiabo baambile mba, 'Pembelelai mu muzhi wa Yelusalema poso mu kayulwe na bulume bufuma Kwiulu. Kufuma kimye Mupashi Wazhila po aishile pe anweba, anweba mukekala ba kamonyi kwi Amiwa mu Yelusalema, Yudeya ne mu Samaliya, kabiji ne konse kwapela ntanda.' Byo atangile kyokyo, wabijikile mba, 'Aleluya, akyo kyo mukeba!' Anweba mwayuka kyo oba? Aye wibatanatu ponkapa poso Bamutambula, kyo kyoka, waikala nabo.

<sup>181</sup> "Inge batatula bya kwamba amba, aye wamba mba, 'Whoop, whoop, whoop, pembelelaiko mineti umo, pembelelaiko mineti umo. Ao ye musango ubilamo bambuzhi, kechi mikoko ne.' Mwamona? Mwamona? Oo, bimye bimo inge bamuzhingijila pacheche, bino uba nobe wibapapasha panyuma pacheche, ne kwamba mba, 'Pembelelaiko mineti umo, sh-sh, sh-sh, sh. Kijitu bulongo.' Aye kine wayuka byo alama mikoko. Ee, Mwane, Amiwa ne mubuula Anweba.

<sup>182</sup> "Mwayuka kine kintu nyi? Amiwa namona Akibishopu *Kananga-ne-kananga* mubuulai amba 'kechi wakonsha kwiya ku uno muzhi na kutekesha mpwijilo ne.' Bino, Mwayukatu, Namutangijile, Naambile mba, 'Yanga nangwa byonkabyo.' Mwamona? 'Abwezhai ao matepu, kabiji kwi aleka akaye kungi ne.' Twayile nangwa byonkabyo! Twayile mu iye mizhi iji kukwe, ne kwamba mba, 'Kyawama, atweba kechi tukali- . . .'

<sup>183</sup> "Kabiji Anweba mwayuka, diabola waishile kokwa, ne kwamba mba, 'Amiwa ne mubekya Anweba Nakonsha kumukanya kwiya mu uno muzhi.' Naambile mba, 'Kuba wikyuba ne. Inge Namubuula mba akaye, ukaya. Nakubekya wakonsha kuya.' 'Ine, ine, ine, ine, ine, Amiwa nkamubuula. Amiwa nkayako na kwamba mba, "Pano, bonse betwingijilako, mukapwile pamo. Anweba kechi mubena kukeba abya bisangajimbwe byakala konko ne, byonse bya lubuko lwa Bulesa lwakala kabiji ne bintu byakala bya Mupashi Wazhila. Abya byapichile kala na batumwa myaka yakunyuma. Mwayuka akyo

kechi kyawama ne, kunyuma kokwa.” Nakweseka kwibapa bipupu byakala, bintu byonse biji byobyaya. Abo . . .

<sup>184</sup> “Bino, Anweba mwayuka kine kintu, aye watwajijile kuya konka nangwa byonkabyo. Wayile konka ne kutatula kutaya bipupu, kufuma . . . Kabiji Anweba mwayuka kika, aya mikoko yatatwile kuja, babena kubayatu byonka byo bafwainwa kwikala. Ee, Mwane. Kimye kyo bajinga na bya lubuko ne mpwijilo kabiji, Mwayukatu, bavula ba mwiabo balunda bakwanyike batatwile. Kika, bamwene mba inge baikala na kikuta kikatampe kya nsono iji nobe bipupu. Anweba mwayuka byo baubile nayo nyi? Yajinga yawama bingi poso banyemena kubena kikalakulo, na kwamba mba, ‘Ntopai Kikye! Ntopai Kikye! Ntopai Kikye!’ Monai, bintu byaumvwanikiletu nobe bibye biji kuno. Pano ponka popo Kiji. Ponkapano po Kiji, mwamona. ‘Lapilaitu, anweba bonse, kabiji ne kubatizhiwa mu Jizhina ja Yesu, monai, anweba mukatambula Mupashi Wazhila. Kyayewa yense waswa, mulekai eye, mulekai aye eye kuno na kumona byaamba Baibolo.’ Mwamona? Kabiji baji na kimye kyawama bingi kokwa.”

<sup>185</sup> “Oo, awa ke mwaana Wami! Awa ke nsongwalume Wami. Kyawama, Anweba mwalanguluka mba wafunjishiwa bulongo nyi?”

<sup>186</sup> “Ee. Kine kyubai,” byo aambile Mupashi Wazhila. “Amiwa na mupa meseko. Mulunda, Amiwa namwesekela *mujije* jishinda, namwesekela *mujoja* jishinda. Amiwa namutayapo panshi, misongo, Namubika munshi. Namukululula, Naleka diabola kumuuba bintu byonse byo akonsha kuuba, aye wabwela jibiji. Aye wayishile mu musangotu umo. Mwamona, waiya jibiji. Amiwa na mulengejile kukolwa. Naubile *kikye*. Amiwa namutaille mukipatela. Namutwajile kukwe Nauba *kikye*, Naubile *kyokya*. Nalengejile mukazhanji ku mwalukilamo, Nalengejile bena kikalakulo ku mwalukilamo, Naalwile bintu byonse. Akyo kechi kyalengelepo lupusano lucheche ne. Waambile mba, ‘Nangwatu Aye wangipaya, neapo Amiwa kamuketekela Aye.’ Amiwa naipaile kisemi kyanji. Natolele *kikye*, Naubile *kikye*, Naubile byonse *bye*, Naubile *kikye*, *kyokya*, *kikwabo*. Nangwa byonkabyo waimenetu bulongo, ‘Nangwa Aye wangipaya, neapo Amiwa kamwingijila Aye! Aye wami!’”

<sup>187</sup> “Oo! Kyawama, Naketekela mba Twafwainwa kumwita kuntu kumo pa kifulo kimo kyawama pakuuba mba tumwikajike bubana.”

<sup>188</sup> Pano, inge bashanji, mu Lulayang’ano Lwakala, waimana amba mwananji pano wa kumanya myaka, kabiji aye ufikilamo ku mwikajika bubana. Kwikala! Basemekwa bwanyike, bino, pakyokakya kimye wikala ke mwaana. Bino pano kechi bakekalapo musango mukwabo ne kanatu kwikala mwanyike,

ke mwanatu byonka biji baana bonse, poso bakoma kabiji bamweshwa byobaji. Nanchi, aye umwita pano.

<sup>189</sup> Pano popo tuji, kipwilo. Anweba mwinengezha nyi? Bino kimye kyachepa kala, muntu yense asume ku munwe wanji, asai ku mweo wenu, kabiji nsukanyai ku muchima wenu, pa kaminetitu kamo. Mwamona? Pano tusakwikajika kipwilo. Bino umvwe kipwilo kyafika pakyokyo kifulo, Aye wamba mba, “Manase, obewa pobe papo. Efulemu, obewa papo.”

<sup>190</sup> Pano umutwala kuntu kumo, bashanji byo booba, kabiji umwikajika pakifulo kyalepa nobe *bibye*, kabiji aye wikala na kusekelela, kabiji bonse beya. Kabiji aye wamba mba, “Nasaka muntu yense kuyuka mba awe ye mwanami, kabiji Amiwa mbena kumwikajika bu mwaana. Kabiji Amiwa nakeba uji yense kuyuka, kufuma pa kino kimye, amba jizhina janji. . . Namumvwika, vwajilo yapusanako. Kabiji Amiwa nakeba anweba kuyuka mba jizhina janji jawamatu pacheki byonka biji jizhina jami. Aye ke mwanami, Amiwa namwalula bubana mu kisemi kyami, nangwatu wajinga mwanami kufuma kimye kyo asemekelwe. Kufuma po atambwijile Mupashi Wazhila, aye waikala ke Mwanawami. Pakuuba pano Amiwa mbena kumwikajika pa kifulo kyanji mu luusa. Akya kyo apanga kya pangiwa, akya kyo atwezha kito kyatwela kito.

<sup>191</sup> “Kabiji kine, kine, Nemwambila namba, inge mwaambila kikye kichi, inge waamba ku yuwe mutumba, ‘Enda kufuma papo,’ kabiji ne kuzhinauka mu muchima obe ne, bino mwaketekela mba kyo waamba kikafikizhiwa, mwakonsha kwikala na kyo mwaamba.” Mwamona? Abyo byokiji; abyo byokiji. Mwamona? “Aye ke mwaana Wami.” Baanga bayuka mba kwalulwabubana, amba ku. . . bamwalulanga bubana panyuma yakushinikisha kwikala. . . Bantu bonse batanga Babilo, kwikajikwa bubana.

<sup>192</sup> Bino, Lesa waubile kintu kimo ku Mwaana Wanji byo Atwajile Yesu pa Mutumba Wakwalulwa. Wasendele popa Petelo, Yakoba ne Yoano, abo ke bukamonyi busatu bwa pantanda. Kwajinga Yesu, Mosesa ne Elaija, kabiji Lesa, ponka pa mutumba. Baimene popa peulu ya mutumba. Kabiji, mwayuka kintu kitanshi, bamwekele, kabiji Yesu watumbijikilwe ku meso abo. Abyo ibyo nyi? Baanga bayuka mba akyo kyo Kinembelo? Kika kyo aubile Aye? Aye—Aye Wamumvwikile mu mukukumba ubula kufwa. Kabiji waambile mba, “Kyanji kya kumvwala kyasamine nobe juba.” Abyo ibyo nyi? Kabiji jikumbi jibanyengamijile. Kabiji Petelo ne Yoano ne abo, baponene kikuvumene. Kabiji bamwene, Mosesa ne Elaija baimana, kasabesamba Nanji. Kabiji Mosesa wafwile kala, kabiji wazhikilwe mu kilende kyabula kuyukanyikwa pa myaka eiti aduleendi. Kabiji Elaija wasendelwe na kalaki kuya Kwiulu, myaka faivi aduleendi yapichilepo kunyuma. Yii! Bino bajingako! Akwa besambilenga Nanji. Monai, Aye wasendele

Yesu apa peulu na kwibamona, na kumona byokiji, kumona kokwa, na kumumweshwa Aye bibye bintu. Kabiji besambilenga Nanji, bajinga Nanji namisambo.

<sup>193</sup> Pano Petelo byo atajileko jibiji kutumbijikwa kwafuminepo pe Yesu, bamwenekotu Yesu yeka, kabiji Jiwi jafumine mujoja jikumbi, kabiji jaambile mba, “Awe ye Mwaana Wami ye natemwa, mumvwayi Aye! Jizhina Janji jijitu pamo ne Jami pakino kimye. Mumvwai Aye!” Byokiji, kwalulwabubana, nangwa kwikajikwa bu baana.

<sup>194</sup> Pano, ako Lesa ko abena kusaka kutwala kipwilo kya Pentekosito mu Buuku wa Efisesa. Mwamona? Bushe anweba—bushe anweba mwaumvwa nyi? Twafwainwa kupwisha mambo kimye kypwa, mwamona, banyike babena kumvwa tulo. Kabiji Amiwa na kukebanga kufika ku iye veeleshi papo, bino kuuba Nekyuba ne, poso ya—yabu 13 veeleshi, monai, lubaji lwapelako, “kubikwa katetesho ka Mupashi Wazhila wa mulaye.” Tukafika ku kyokyo pa Mulungu, monai. Talai. Pano, kiji byepi, ng’anyi kintu kitutwezha mukachi, kabiji tulamwa byepi ku Kikyee.

<sup>195</sup> Bino pano “kwikajikwa,” muji byepi? Obewa patanshi usemwa mu Bufumu konka ku Mupashi Wazhila. Baanga bayuka kyokyo? Kijitu bulongo. Kyalondelapo, obewa watongwelwa jimo kuubaka? Kwalulwabubana. Kyokika kyo? Obewa watongwelwa jimo kwikajikwa.

<sup>196</sup> Oo, Nyenga Scott, Naketekela mba iye, waikala papo. Obewa kechi yobe wajinga kunzubo leelo nyi? Lufunjisho lubena kukumbana kulubaji lumo lwa pantanda, mwaya mampuzha apusanapusana mu kyaalo, Amiwa ne lumvwapo, bimye byavula, amba Yesu uji pano pantanda, na kwendauka mu mubiji, Aye wiya ne kuuba *kikyee*. Abo ke bubela! Mupashi Wazhila Wanji uji muno, kabiji Aye ubena kweseka kwikajika Kipwilo Kyanji, pakuuba mba Kipwilo Kyanji kikale mu ndonda, Kwikajika mu Ntanda ya mulaye, pakuuba mba bakonsha kutwela...pakuuba mba balwanyoni bonse bapangiwe.

<sup>197</sup> Bena manase kechi bakonsha kwangata iye ntanda ne. Amiwa kechi nakonsha kwikala na mpwijilo ya lubuko... kasa...Amiwa ngyaa moomwa ne kusapwila lubatizhilo mu Jizhina ja Yesu Kilishitu, kabiji ba—kabiji balongo baketekela mu balesa basatu babena kwamba mba, “Oo, aye ke Yesu Yekatu wakala.” Kabiji Amiwa kechi nakonsha kuyako na kwikala na lubuko lwa Bulesa bino afu wa mwiabo kasa abena kwamba mba, “lubuko lwa Bulesa lujitu bulongo,” kabiji bavula ba mwiabo bomvwa bulongo bya kukumya bya kwa Nkambo ne kwamba mba, “Kyawama, Naketekela mba Mulongo Branham ngauzhi, bino lekai nemubuleko kintu kimo. Kikulutu Mupashi uji pe aye, kabiji aye ubena kuyuka bapashi, aye ye kalume wakwa Nkambo. Bino Lufunjisho lwanji lwabola,



Kechi luji bulongo ne.” Baanga baumvwapo byoby mwabula maana? Kyafwainwa kwikala kya Lesa nangwa kechi kya Lesa ne. Abyo ibyo. Kyafwainwa kyonse kwikala kya Lesa nangwa kechi kya Lesa ne. Ajo jo jishinda mo kyaikela. Pano anweba musakwikala byepi? Bena manase kechi bakonsha kulama mpuzha yanji ne, Efulemu kechi wakonsha kulama mpuzha yanji ne, Gadi kechi wakonsha kulama mpuzha yanji ne, Benamina kechi wakonsha kulama mpuzha yanji ne, bonse babena kunyematu na bena Filisitiya, kabiji byonse byalubakana. Tusa kwikajikwa byepi? Bino twasemekwa ku Mupashi Wazhila, atweba bonse. Abyo ibyo nyi? Twasemekwa kwikala ka? Kutongwelwa jimo...Panyuma ya kusemwa, atweba tutongwelwa jimo kwalulwabubana, mu kwikajikwa mu Mubiji wa Kilishitu. Mwamona mo Nekitazha nyi?

<sup>198</sup> Ye muka Mubiji wa Kilishitu? Bamo batumwa, bamo bangauzhi, bamo bafunjishi, bamo basapwishi, kabiji bakwabo bakafunga. Abyo ibyo nyi? Twaitwa ku kyokyo. Bakwabo baji na byabupe bya jimi, kulumbulula jimi, milangwe, maana, bya kukumya, mingilo ya byakukumya, byonse bye byabupe byapusanapusana. Kabiji pano bakonsha kuuba byepi? Baesekanga kyokyo pacheche. Kika? Kilekaitu kiyenga byobyo nobe Amiwa kechi nayukapo kine kintu ne. Umo waimana, waamba mu jimi, kabiji mukwabo waya kulutwe, nakwamba, “Blrr, blrr, blrr, blrr, bya musango yewo.” Uu-uu. Musapwishi uka sapwilanga, ne kwita bantu kukitapisho, kabiji muntu umo waimana, waamba mujimi, “Aleluya! Lukumo lwikale kwi Lesa!” Inge aye—inge musapwishi watwajijila na mbila yanji, byo ashingwa manyi, ne bantu baamba mba, “Wabwela panyuma wakala.” Mwamona, ke mambo akuuba mba kechi bafunjishiwa ne.

<sup>199</sup> Aye Baibolo waamba mba mipashi ya bangauzhi ikokela bangauzhi. Lesa kechi ye wakivundakanya ne. Inge Amiwa naimana pano, nangwa wamingilo uji mu kushingwa manyi kwa Lesa, nangwa ukeba byepi kwamba mu jimi, wafwainwa kuzhindama poso Lesa wapwisha kuno. Nanchi inge waamba na jimi, kechi kyafwainwa kwikalatu kupituluka mu Kinembelo ne, mambo Lesa waamba mba kechi mwikale bakubwelulukatu mu bintu bimo ne. Pakuuba ke mbila ibena kuya ku muntu umo. Ngipuzhai kimye kimo, tongolai kimye kimo akyo Mupashi Wazhila kyo aubilepo, kasa tuji mu kuyuka bapashi, na aambila muntu umo, na kupitulukatu mu Kinembelo kimo jikwabo ne jikwabo. Kibabujilwe kintu kimo kiyatama ne abo kabiji nangwa kintu kimo kyo bauba, kabiji kintu kimo kyo bafwainwa kuuba nangwa kintu kimo kyamweka, nangwa kintu kimo kiji byobya. Abyo ibyo nyi?

<sup>200</sup> Nanchi ne kwamba mujimi ne kulumbulula! Inge mujipo umo mu kipwilo wamba mu jimi, kabiji mukwabo walumbulula, ne kwambiwa bibye: Lekai Mulongo Neville emane ne kwamba

na jimi, kabiji awe mulongo papo wapana kilumbululo, kwamba mba, “Bulai yuwe muntu papo amba keesha wayile kukwe kabiji wakobile kintu kyo afwainwa kubula kuuba. Pano leelo dokotala wamubula mba uji na kaasa. Yanga ukawamishe kikye kintu, ubwele kuno kabiji ubwele bulongo na Lesa.”

Muntu wamba mba, “Kinetu, akyo bukine.” Nanchi Lesa uji nenu.

<sup>201</sup> Pano tusakwikyuba byepi muyuwe musango? Mwamona? Kijiiitu mba, “Blmp, blrr, blrr, blrr.” Kyaubiwatu mungi mungi, muji monse, kwakubula kwikajikwa ne. Pano byokiji. . . Monai, Efisesa, babena kweseka. . . Mwamona, bapusa kyokyo. Mwamona byo be kipusa nyi? Atweba twatongwelwa jimo kwalulwabubana! Pano baanga baumvwa mo Nekitazha? Sutulaiko kuboko kwenu. Kwalulwabubana! Atweba twasemwa mu Mupashi wakwa Lesa, kine, tutambula Mupashi Wazhila, ne kujila mba, “Abba, Taata! Aleluya! Lukumo lwikale kwi Lesa!” Atweba tuji, abyo ibyo, twibaana, bino kafwako kotwafwainwa kuya ne. Kechi twafwainwa kupuma bena Filisitiya ne.

<sup>202</sup> Talai pe Billy Graham byo aimene popa. Kabiji awa Mwinamuhamandi kasa amba mba, “Kishiniikishe Kye.”

<sup>203</sup> Monai pe Jack Coe waimene byobya. Kabiji awa mutushi, awa wa kipwilo kya Kilishitu kwiimuna maboko na awa mutushi kokwa, kabiji ne kutola maboko. Wafwainwa kutelwa mba Mwinakilishitu, kabiji kasa beimuna maboko na diabola uji nobe Joe Lewi, kabiji wakasuluka kulanguluka kiji kyonse, kabiji ne kufinga Lesa ne kwamba mba “kechi kujipo kintu kya kwamba mba Lesa ne, nangwa byonkabyo, kyakutatwilapotu,” ne bintu biji yuwe musango. Kabiji kipwilo kitela akyo kine mba kipwilo kya Kilishitu, ne kwiimuna maboko nanji, kabiji ne kutola lubaji lwa kwimena Mulongo Jack Coe. Twakonsha kuuba byepi kiji kyonse? Kabiji ba Pentekosito, ne bavula mwi abo, bamwimejile; kimye, musapwishi yense mu ntanda yetu wafwainwa kwimana jina-pa-jina ne aye, ne kwamba mba, “Lesa, tumai Bulume Bwenu.” Monai, abyo byokiji, kwepi ko ryakonsha kubula kubikwa.

<sup>204</sup> Efulemu kechi ukeba kwikala ne. Umo mwi abo waya kukwe, twatana bena Manase bafika kukwe, baamba mba, “Oo, ami, Yehoba wapa bujimi bwawama bwa wichi!” Nanchi kuno kwaiya, Gadi, waamba mba, “Kyawama, pano, pembelelai mineti umo. Amiwa nafwainwa kujima bipangwa, bino Amiwa sakutambula wichi ne aye. Aleluya!” Anweba mwamona? Obewa kechi ujipo na kyakuuba na wichi ne; tambula bipangwa, bipangwa byo byobe bya kujima. Obewa kechi wafwainwa kufunga mikoko ne inge wafwainwa kufunga bang’ombe. Lesa ukeba kwikajika Kipwilo. Pakuuba bonsetu bakeba kuuba kintu kimotu. “Aleluya!” Obewa kuuba wibabuula kintu pa kikye ne. Ine, ine. Abo bakijitu na yewa musango wa bumbuzhi, “Butt,

butt, butt, butt, butt, butt, butt.” Monai, kuuba mwibabuula ne. Abyo ibyo. Bino, akyo kechi kyakine nenyi? Kabiji kuuba waikajika kipwilo ne. Mwamona?

<sup>205</sup> Kipwilo kyafwainwa kutongwelwa jimo kwikala baalulwa bubaana, ako muntu... Lesa wakonsha kutola muntu ne kumwalula ke wa mukisemi, kabiji wamupa ne kintu kimo. Kyakuuba mba, patanshi, esekai kyokyo ne kumona kana kiji bulongo. Aye Baibolo waamba mba ngyesekai mupashi. Awe muntu wamba kintu kingi, kyesekei ne kumona kana kiji bulongo. Inge kiji bulongo, endai nakyo. Nanchi baamba mba, “Nkambo, tuntuminai kintu kingi.” Twajijilai na kwenda, monai, twajijilaitu na kwenda poso muntu yense watola kifulo kyanji. Pano po mukamona kipwilo kya Lesa kyatatula kutola kifulo kyakyo. Apo bena Filisitiya po bakatatula kupana bukikizhi. Tuputula po tukataiwa, suki po ikakoma kufika panshi, bilungi bikomvwewa; fwaka kechi ukamwekanga ne. Abyo ibyo. Inge Kipwilo kyatatula kwikala mu Bulume Bwakyo, inge twaikala na Ananyasa ne Safila, kabiji ne bakwabo bacheche. Ee, mwane. Mukamona kimye Kipwilo kyazhila po kikemana pamo mu Bulume Bwanji, kyaikajikwa mu kifulo kyanji nobe baana ba Lesa, baalulwa ke kisemi kya Lesa, Kipwilo kya bulume kasa kyaimana byobya mu lukumo Lwakyo. Oo, akyo Aye kyokyo abena kunanga.

<sup>206</sup> Monai byo tuji kwalepa, balongo? Kechi mwakonsha kwiya ne pamo pa Kilembelo ne. Kabiji muntu uji yense, muntu uji yense wakonsha kubula kumona lubatizhilo mu Baibolo, mu Jizhina ja Yesu Kilishitu, aye ye mpofu nangwa kintu kimo mu milanguluko kyatama. Abyo ibyo. Kabiji pano po paji bulwi bukatampe.

<sup>207</sup> Amiwa nakonsha—Amiwa nakonsha kwambila muntu yense wakonsha kundetela Kinembelo kyonse apo muntu umo wabatizhiwe mu jizhina jikwabo japusanako na Jizhina ja Yesu Kilishitu, mu kipwilo kipya. Nangwa, inge wabatizhiwe mujishinda jikwabo, aye wabatizhiwe jibiji mu Jizhina ja Yesu Kilishitu, pakuuba mba atambule Mupashi Wazhila. Mwakonsha kwiya ne nkumwasha. Kechi kujipo byavula ne. Kechi kujipo kutumwa kwa musango yewo ne. Kimye Yesu kyo aambile popa, “Okao mambo yainga, nakufunjisha mikooka yonse ya bantu, ne kwibatizha mu Jizhina ja Taata, Mwaana, ne Mupashi Wazhila,” Taata, Mwaana, nangwa Mupashi Wazhila, kechi pajipo jizhina ne, kafwapo nangwa jimo ne, Petelo waalulukile, moba jikumi palutwe, waambile mba, “Lapilai, ne kubatizhiwa, anweba bonse, mu Jizhina ja Yesu Kilishitu, mu lulekelo lwa mambo enu.” Kabiji konse konse mu Baibolo . . .

<sup>208</sup> Kabiji pano kuno kwajinga bamo ba batizhilwe kokwa, mujishinda jikwabo, kwi Yoano, mu lulapilo. Paulo waambile

mba, “Obewa wafwainwa kubatizhiwa jibiji. Obewa wafwainwa kwiya jibiji.”

209 “Oo, bino twabatizhiwa ku muntu wazhila mukatampe, Yoano. Aye wabatizhe Yesu.”

210 “Kijitu bulongo, ao o Mamboawama. Awe ye Mupashi wakwa Lesa ao ukasololwa kwi amiwa. Amiwa ne mutumwa wa Nkambo, kabiji inge malaika wafuma Mwiulu waiya wasapwila kintu kikwabo. . . .”

211 Lekai tange kyokyo. Aye Baibolo waamba mba, “Inge malai- . . .” Paulo waambile mba, “Inge malaika wafuma Mwiulu waamba kintu kingi,” bishop, akibishop, papa, mukulumpe, musango yense ye ajimo, “inge wasapwila kintu kingi kyapusanako na Kikye kyo Nasapwila kwi anweba, mulekai afigingwe mafingo.” Kechi kujipo. . . . Atweba kechi tujipo na kisho kya musango yewo ne. Ine, mwane. Anweba. . . . Kechi kujipo kintu kya yewa musango. Anweba, atweba. . . . Kabiji nanchi—nanchi, monai, kika bantu kyo bakonsha kubula kumwena kyokyo? Kika bantu kyo babujila—kyo babujila—kyo babujila kuketekela kyokyo? [Muntu umo mu kipwilo waamba mba, “Watongwelwa jimo”—Waku.] Mwamona? Muntu umo waji kwikyamba ponkapa, Gene. “Watongwelwa jimo,” byokiji. Kika? “Bonse bobapa Amiwa kwi Bataata” (kika?) “bakeya kwi Amiwa.” Mwepi mo kyaikela! “Bonse bobapa Amiwa kwi Bataata bakeya—bakeya kwi Amiwa.” Lukatazho lujipi ne amiwa, amiwa mbena kweseka kwikikeba? Tuji pano. Kijitu bulongo.

212 Lekai ntange yuwe veeleshi popo Nsakwimubuula bika Paulo, bintu byo. . . . Yonka Mbila yo Nasapwila bufuku buno, abye byo byaambile Paulo pa kutongwelwa jimo, pa lubatizhilo mwi Yesu mu Jizhina, lubatizhilo lwa Mupashi Wazhila, kwikajikwa mu kipwilo, ne bikwabotu. Abye byobyoyo aambile:

*Amiwa nakumya (kubuula bena Galatiya) amba anweba bukiji bukijitu mwafuma kwi aye wimwichile ku . . . bupe bwa Kilishitu (Amiwa ne mumvwina buvu, mu byambo bikwabo, amba anweba mwaleka muntu umo kwiya kuno, ne kwi mufumya ku Kyokya.) ne kuya ku mambo awama angi:*

*Bino kechi kuji akwabo ne; pakuuba kuji bamo be mukatazha, basaka kwalulula mambo awama a Kilishitu, kwalulula aa ene Mambo awama a Kilishitu.*

213 Bino talai. Pano, vulukai, kyajinga Paulo wakambizhe muntu yense wabujile kubatizhiwa mu Jizhina ja Yesu Kilishitu, kwiya na kubatizhiwa jibiji mu Jizhina ja Yesu Kilishitu. Baanga bayuka mba akyo kyakine? Baanga bayuka mba kyajinga Paulo waambile mba abye byafyamika byafyamikile kufuma ku kintendekesho kya ino ntanda, kabiji byasololwa kwi aye, amba

twatongwejlwe jimo kwikala baana ba Lesa mu kwibekajika bubana, wajinga Paulo? Talai papo byo aambile:

*Bino nangwa atweba, nangwa malaika wafuma  
mwiulu, wi musapwila mambo awama akwabo  
apusanako na oa o twimusapwijile anweba, ekale  
wafingwa mafingo.*

<sup>214</sup> Kechi kwambatu mba, “Amiwa napusana nobe, mwane.” Mulekaitu ekale wafingwa mafingo. Lekai tange veeleshi walondelapo:

*Monka mo naambila kala, mo monka Amiwa  
mo ng'amba ne pano, Namba umvwe muntu  
wasapwila mambo awama angi kwi anweba na ao o  
omwatambwile, kala ekale wafingwa mafingo.*

<sup>215</sup> Abyo ibyo. Pano, mulongo, nyenga, inge kyajinga Lesa juba jikwabo, kabiji Na—Naamba kyokyo, kechi naketekela mba biji byabula mwingilo ne, akyo kyandeta amiwa ku kiky kicheche... Pano, Amiwa jina kisangajimbwe; Amiwa kechi nalanguluka mba Njina kisangajimbwe ne, Amiwa tambwilamo mapesho mu kusapwila. Amiwa ne lubakotu amiwa mwine kabiji Nemulama muno poso Nayuka mba anweba mubena kukunuka ne kukoka. Bino, oo, Ami... Inge anweba—inge mwakonsha kuyuka byo Mbena kwimukeba anweba kuno! Mwamona? Kabiji inge Ami, kimye kimo Naamba kiky jibiji, inge Na... byo Aambile... Naambile mba, “Kyakonsha kuuba...”

Aye waambile mba, “Wakonsha kutemwa kumona mpelo byo jji nyi?”

<sup>216</sup> Ponkapo Natajile panyuma kabiji nemwene amiwa mwine kasa nalala pa mwanya. Kine anweba mwangyuka pa kimye kyabaya kya kuuba mba mwakonsha kuyuka mba—mba—mba Amiwa mbena kwimubula anweba kya Bukine. Nasaka kwi mwipuzhapo kintu kimo, nobe Samwela byo aambile kasa bakyangye kushinga manyi Saulo, bushe Ne mubulapo kiji kyonse mu Jizhina ja Nkambo nyi kana kyajinga kyakine? Abyo ibyo nyi? Kimye kyonse kikala kya kine. Bushe Amiwa nakiyapo nemulomba mali nangwa kintu kiji byobya nyi? Ine, monai, Amiwa kyangye kubapo byobyo ne. Bushe Amiwa nakyubapo kintu kiji kyonse nyi kanatu kwesekesha mo nayukila kwi mutangijila kwi Kilishitu? Byokiji.

<sup>217</sup> Kino kimye bakeba kwamba mba Amiwa ne utanga milanguluko ya bantu, mwayukatu, wingijisha bapashi kuyuka milanguluko ya bantu. Mambo, abye bintu byafwainwa kuvula, Baibolo waambile mba bikobiwa. Nobo byonka ba Yambalesa ne Yanesa byo bakosakejile Mosesa, baubile pepi bintu byonka byaublepo Mosesa, poso byo kyafikile pa kimye kya kubekya. Abyo ibyo. Bino vulukai, Yambelesa ne Yanesa kechi bakonsheshe kubuka ne. Abo kechi bakonsheshe kubuka ne.

Bakonsheshe kuleta myalo, bino kwi yifumyamo ne. Mwamona? Kijitu bulongo. Pano, Lesa ye Ubuka. Kyambo kya Lesa kyo kishala Bukine.

<sup>218</sup> Amiwa naeseka kwikala wa kishika ne anweba. Naeseka kwi mubuula Bukine. Naikala—Naikala . . . myaka pepi nobe sante-wanu, Naimana pa yuwe pulupiti, kubula ne kwimana ponka, pa myaka sante-wanu, kabiji juba jimo kafumapo kuya mu Lukumo kufuma mu uno pulupiti. Kwajinga mukazhi, mwaana wamukazhi, taata, mulongo, bonse bazhikwa pa bushiya popa, balunda bawama. Amiwa namona ma bokoshi abo ne maluba kubikwa ponka, kabiji nayuka mba juba jimo yami byo yikekala, ne ayo. Bino, akyo kyabukine. Bino kyakishika, kufuma mu muchima wami yense, Ne mubula na muchima wami yense, Naketekela mba Amiwa nasapwila kwi anweba Mamboawama akwa Nkambo Yesu Kilishitu. Naketekela mba wafwainwa kubatizhiwa, anweba bonse, mu Jizhina ja Yesu Kilishitu, kabiji ne kutambula lubatizhilo lwa Mupashi Wazhila. Kabiji umvwe wikyuba, kikaleta kwi anweba lusekelo, mutende, kukoka muchima, buwame, bukimote, lusa, butekanye, lwitabilo.

<sup>219</sup> Kabiji juba jikwabo, kyamwekele kwi amiwa alwa lukeelo, kechi Nayuka ne. Amiwa kechi nakonsha kwamba ne kana Najinga muno mu mubiji wami ne kumona kimwesho, nangwa kana Nafuminemo muno, kuya kokwa. Amiwa kechi nayuka ne, Amiwa kechi nakonsha kwamba ne. Kintutu kimo kyo Nayuka, kyakuuba mba Amiwa—Amiwa kimye kyonse najinga na moyo wakufwa, akya kifulo kicheche kya lumuna. Bino kechi kuuba moyo mba Yesu ukabula kwiya na kusenda ne, bino, Amiwa kechi najinga na moyo wa kyokyo ne, mambo Ami—Ami kechi nachiyinenga kyokyo ne; bino inge Amiwa nasambakana ne obewa kabiji naikalatu luya lucheche lwakala lubena kupitatu mu mwela. Bino Amiwa namona pa kino kimye. Byo Namwene aba bantu, bajinga bakine. Kabiji bajinga abo kimye kimo bonakwatakananga nabo pano pa ntanda, kufikatu ne kumukazhi wami mutanshi. Aye kechi wajinga mukazhami ne, wajinga nyenga yami. Aye kechi wangichilepo mba ne mulume wanji ne, wantelele mba ne mutemwe mulongo wanji. Akwa kechi kwajingapo ng'umvwinno ya kupusana kwa mibiji ne; kyajinga kyalumbulukatu, kyajingatu buwame, kyajinga bulumbuluke.

Mbena kukumya, Amiwa kechi nayuka ne, Mbena kukumya: Ibyo byo amwene, kasa akyangye kufuma pantanda? kimye kyo ajinga mu kipatela, byo Namwichile, kabiji waambile mba, “Billy, wikisapwilapo, obewa waambapo pa kikye, bino,” waambile mba, “obewa kechi wikiyuka byo kiji ne.” Aye waambile mba, “Amiwa kechi njipo na kilaka kya kwikala ne.”

<sup>220</sup> Amiwa nakumya kana abya byo kiji, na yewa muntu wa bulesa, wazhijikwa muntu mukote F. F. Bosworth, ao waimananga mu uno pulupiti, wasapwijile pamo ne amiwa

kuzhokoloka mampuzha apusanapusana a pano pantanda. Wakala F. B. Bosworth, anweba bonse, pepitu, mwamuyukile aye; wa bulesa, muntu wazhijikwa mukote. Ma awala abiji kasa akyangye, kyawama, pepi nobe mulungu umo nangwa ibiji kasa akyangye kuya ne, Amiwa nayile kwi aye kabiji walajile kapaba, kunyuma, pepi nobe myaka naite. Maboko anji acheche akwachile, mutwe wanji mucheche wakipepule kabiji ne myevu itoka mu kilungi kyanji. Natolele awa mwanamulume mukote mu maboko ami kabiji Nabijikile mba, “Bataata, bataata, makalaki a Isalela ne bambili babo.”

Mambo inge kwajinga muntu waimejileko Pentekositi kabiji wajinga mutumwa wakine, wajinga F. F. Bosworth, wawaina, watanamatu, ene Mamboawama, monai, wajinga Bosworth. Kabiji byo Namukwachile mu maboko ami, kabiji Nabijikile mba, “Bataata, bataata, makalaki a Isalela ne bambili babo.”

<sup>221</sup> Aye waambile mba, “Mwaana, ikala mu mwingilo.” Waambile mba, “Tuma bamo ba mubaabo balongo ba kyanyike kuya mu mwingilo mubyalo bingi, inge wakonsha, kasa bakyangye kutambulwila myendeleko kokwa ne. Batwajile Mamboawama a kine oo uji nao, mwaana.” Aye waambile mba, “Mwingilo obe ukyangye kutatula ne byo akekala.” Waambile mba, “Obewa wi Branham mupya wakatataka.” Waambile mba, “Obewa ukiji mwanyike, mwaana.”

Naambile mba, “Mulongo Bosworth, Njina myaka foote-  
eiti.”

<sup>222</sup> Aye waambile mba, “Obewa ukyangye kutatula ne.” Aye waambile mba, “Kechi uleke baabo ba Pentekosito basapwishi bakwanyike kuyako na sapwilo yabo yabulamo maana ne, ne kuleta bulembe ku kikye kintu, kabiji ne kutola bonse ba—batomesha ne kyaalo kyonse ne Kwikimena kasa ukyangye kuyako ne.” Waambile mba, “Yangatu, Mulongo Branham, yangatu na Mamboawama o uji nao.” Aye waambile mba, “Na—Naketekela mba obewa wi mutumwa, nangwa ngauzhi wa Nkambo Lesa wetu.”

<sup>223</sup> Amiwa na muntajile, Na mukumbachile mu maboko ami. Naambile mba, “Mulongo Bosworth, Nakeba kukwipuzha jipuzho. Ng’anyi kimye kyo wajinga bingi na lusekelo mu . . . mu kimye kya . . . myaka yonse yo wasapwijile?”

Aye waambile mba, “Ponka pano, Mulongo Branham.”

Naambile mba, “Bushe wayuka mba ubena kufwa nyi?”

Aye waambile mba, “Amiwa kechi nakonsha kufwa ne.”

Amiwa naambile mba, “Kika . . . Kika kyo waambila mba kino kyo kimye kyobe kyo uji na lusekelo lwabaya bingi?”

<sup>224</sup> Kwajinga kibelo kicheche. Aye waambile mba, “Amiwa nalala pano na kilungi kyami kyatala ku kyokya kibelo. Kimye kiji kyonse, Awa Amiwa ye natemenwe, kabiji Awa ye

Nasapwilangapo ne kwimana kulubaji lwanji, yonse ye. . . bumi bwami, Aye ukeya pa kyokya kibelo mambo ami, kabiji Nkaya Nanji.” Natajile pe aye, Nalangulukile mba, Amiwa—Amiwa mbeni kumweka musango umo nobe byonka byo Nakonsha kwi Abulahama, Izaka, nangwa Yakoba.

<sup>225</sup> Natolele kuboko kwanji, Naambile mba, “Mulongo Bosworth, bonse babiji twaketekela Lesa umo, twaketekela bintu bimo. Mwayila lusa lwa Lesa Amiwa kasapwila poso kupema kwapelako kwafuma mu mubiji wami. Amiwa kekala wakishika kwi Lesa monka mo Nayukila kwikala. Amiwa kechi nkanekenya pa Mamboawama ne kulubaji lwami nangwa kifulo kiji kyonse. Amiwa nkekala wakishika monka mo Nayukila kwikala. Mulongo Bosworth, Amiwa nkasambakana nobe mu Ntanda yawama mo ukabula kwikala mwanyike. . . nangwa kubula kwikala mukote jibiji, kana bwanyike.”

<sup>226</sup> Aye waambile mba, “Obewa ukekala konka, Mulongo Branham, kechi usakamane ne.”

<sup>227</sup> Kabiji awala umo kasa akyangye, ma awala abiji kasa akyangye kufwa. . . pepi nobe bang’ondo babiji palutwe, Nalangulukile mba ubena kufwa ponkapa, mukazhi wami waishile na kumumona (aye kimye kyonse walangulukilenga bingi pe aye), kabiji pano ne ba Mrs. Bosworth. Kabiji pepi nobe ma awala abiji oo alajile, walajile tulo. Aye wabukile, watajile, kabiji wakilukile kufuma pa mwanya wanji. Aye waambile mba, “Maama, kyawama, Amiwa kechi nakumonapo pa myaka ne! Taata! Mulongo Jim, kika,” waambile mba, “lekai tumone, obewa wajinga umo wa bo naitabizhe kwi Nkambo, ku Joliet, Illinois.” Aye wafwile kala pa myaka fiifite. Mwamona? Ee! Aye waambile mba, “Obewa wi Nyenga *Kananga-ne-kananga*. Ee, Nakutangijile kwi Nkambo ku—ku mpwijilo ya ku Winnipeg. Ee. Kika, uno ke Nyenga *Kananga-ne-kananga*. Amiwa kechi na kumonapo. . . Ee, mwamona, obewa wayishile kwi Nkambo pa *kananga-ne-kananga*.” Kabiji pa ma awala abiji watwajijiletu na kwiimuna na boba bo atangijile kwi Nkambo. Waendele kubwela pa kifulo kyanji, ne kulala walala, wakimbakanya ne maboko anji, kabiji kyo kyonka. Bushe Mulongo F. F. Bosworth watwelele mu yoya Ntanda Yesu yo amwesheshe bufuku bukwapo nyi? Inge byokiji, aye ke mwanyike bufuku buno. Lesa akokoloshe mweo wanji. Kabiji lekai Ngikale wakishika kya kuuba mba Amiwa nkatwele mu yoya Ntanda. Kabiji lekai Ngikale wakishika ka—kalume kwi Kilishitu!

<sup>228</sup> Amiwa naumvwa buvu pa bumi bwami. Amiwa naumvwa buvu kas- . . . Amiwa—Amiwa. . . Inge Nalenga mambo ku meso enu anweba bantu, anweba—anweba muji na kongole ya kwiya kwi amiwa na nkumbula. Mwamona? Amiwa ngeseka kwikala bwikalo bwaoloka mu bintu byonse Lesa byo atangijila mba ngube monka bupe Bwanji. Mwamona? Mwamona? Bino, talai, balunda, anweba mwafwainwa kwi amiwa inge mwayukapo



kintu kimo kyatama mu bumi bwami, mwayiya na kumbulakyo. Kabiji, talai, Amiwa njina kongole kwi anweba ya kwimana kuno ne kusapwila Mamboawama a kine. Amiwa njina kongole kwi anweba, mambo Mbena ku ketekela kwi bimona bilungi byenu, banabalume bakitwala ne banabakazhi, kubushiya kokwa. Pajitu kupema kumo na po muji kino kimye ne kokwa. Pano, abyo ibyo. Nko iji.

<sup>229</sup> Kabiji lekai Lesa wa lusa lonse, Lesa wa Mwiulu, kechi myendeleko ne, kana na munema, “Papa,” pa joja juba jo tukabwezhiwa ne kwikala na mibiji yetu ne jikwabo, nanchi twakonsha kutoma, ne kuja magelepu ne bipangwa bya muyoya ntanda. “Bakashimika ma nzubo kabiji kechi mukekala muntu mukwabo ne. Bakajima bipangwa kabiji mukwabo kechi ye ukaja ne.” Mwamona? Muntu umo wajima bujimi bwa bipangwa, mwaana wanji wi butoola, kabiji naye mwaana wanji wi butoola, kabiji ne ba kwanji. Pakuuba kechi muyuwe musango ne; aye ukajima ne kwikala ponka. Mwamona, abyo ibyo. Tukekala konka myaka ne myaka. Kabiji lekai, mu yoya Ntanda, lekai Nkamone anweba bonse.

<sup>230</sup> Kabiji Amiwa nayuka mba Mbena kwamba muno ne ku bamingilo baketekela mu balesa basatu. Kabiji, balongo bami, Amiwa kechi mbena kwamba kikyeye—Amiwa kechi mbena kwamba kikyeye mu kwi mukozha ne. Na ketekela mu Balesa basatu, ne amiwa, Naketekela mu balesa basatu, mu basatu ba mu milanguluko ya Lesa (Taata, Mwaana, ne Mupashi Wazhila), bino kechi ba Lesa basatu ne. Mwamona? Amiwa naketekela mba kuji milanguluko isatu, kya bukine, Nauba kyokyo na muchima wami yense, “Taata, Mwaana, ne Mupashi Wazhila,” bino kechi ba Lesa basatu ne. Bajitu isatu milangulu- . . . nangwa ma ofweshi asatu akwa Lesa. Lesa wayikelepo jimo mu Butaata, Bumwaana, kabiji pano Mupashi Wazhila. Ke Lesa umotu mu maofweshi asatu. Kabiji abo baji . . .


<sup>231</sup> Kabiji Taata, Mwaana, ne Mupashi Wazhila, kechi pajipo Jizhina ja Lesa ne. Lesa uji na Jizhina jimo, kabiji Jizhina Janji ke Yesu. Aye Baibolo waamba mba, “Kisemi Mwiulu kyatelwa mba Yesu, kabiji kisemi kya pantanda kyatelwa mba Yesu.” Abo ibyo. Nanchi Lesa wajinga na Jizhina jimo, Jizhina ja buntu. Aye wajinga . . . na jizhina jatelwa mba Yehoba-umwena, Yehoba-lubuko lwami, abyo byajinga bifulo Byanji bya Bulesa. Bino Aye wajinga na Jizhina jimo: Yesu! Kabiji Aye ye Iye.

<sup>232</sup> Kabiji kyakine, balongo bami, inge mwakonsha kupusenamo ne amiwa, vulukai, Ami—Ami—Amiwa nkemukumanya kokwa, nangwa byonkabyo. Mwamona? Ami—Amiwa kecala nenu konkwa. Kabiji Lesa emupeshe. Kabiji Ne mutemwa.

<sup>233</sup> Kabiji Amiwa nakeba kipwilo kuvuluka pano, Pamulungu lukeelo tukatwajijila kufuma ponkapo kabiji Amiwa nkeseka kechi kwimulama kukila pa tuu koloko ne, pakuuba mba

twakonsha kwikala na mpwijilo ya mute, inge twakonsha, kabiji inge Nakonsha bulongo byonka byo Nauba bufuku bunu, teni-sante. Mwandekelako mambo? Balunda, kechi tuji na kimye kyabaya kyashalako ne, mutemwe. Na—Na kutela obewa “mutemwe” mambo obewa byo uji. Anweba—anweba mwi batemwe bami. Mwayuka kine kintu nyi? Lekai. . . Kino ke Kinembelo kyaiya. Paulo waambile mba, “Amiwa ne mulwila mukao (Kipwilo Kyanji) na mukao wa bulesa, mambo Amiwa ne mwipanguzha.” Byokiji, abya byokiji. Byokiji. “Mambo Amiwa ne mwipanguzha anweba, ne mukobekela kwi Kilishitu, nobe kisungu.”

<sup>234</sup> Bino, inge akya kyajinga kyakine pa joja juba, waambile mba. . . Abo, bantu baambile kwi amiwa, amba, “Yesu ukeya kwi obewa, kabiji obewa uketupana kwi Aye,” bukisungu. “Kupingulwa na Kyambo kyonka kyo wasapwijile kwi abo.” Kabiji, talai, inge Nasapwila kwi anweba byonka bya sapwijile Paulo ku kipwilo kyanji, inge jibumba janji jatwela, jetu ne atweba, mambo tuji na kintu kimo. Amena.

Twayai tukunyike mitwe yetu byo tubena kwamba mba, “Lesu emupeshe.” Pano. . .? . . . mutemwe wetu watemwikwa kafunga, Mulongo Neville. 

*KWALULWABUBANA* 2 KDE60-0518

(Adoption 2)

LUFUNJISHO LWALONDAKA LWA KWALULWABUBAANA

Ino Mbila na Mulongo William Marrion Branham, yalupwilwe patanshi mu Kizungu pa Kisatu mabaanga abufuku, 18 Ndoolo, 1960, ku Branham Tabernacle ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2022 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)